

出使日記續刻

出使日記續刻卷之五

無錫薛福成叔耘

光緒十八年閏六月初二日記

法蘭西通國有三十三省八十七府居民共三千七百十五萬內入天主教者三千六百五十萬人入耶穌教者六十萬人入猶太教者五萬人而耶穌教又各分門戶約有數種西人之初入中國者不以通商而以行教傳教之士如利瑪竇湯若望南懷仁輩西學頗優而亦兼通中學彼按中國字義譯彼之聖人曰耶穌者中國俗語呼父曰爺其敬而畏之者亦曰爺如金人之呼

宗爺爺岳爺爺今巴蜀漢沔間呼諸葛武侯亦曰爺耶者爺也蓋兼敬愛兩義焉。蘇者蘇也以其既死數日之後而復蘇也。

初四日記

英法諸國外部尙書雖不時換人而其下辦事之侍郎總辦等則皆數十年在此署中往往終身不換如英之外部侍郎克蕾副侍郎山特生法之外部侍郎尼薩等皆在外部辦事二十餘年比國之侍郎郎貝爾芒已專辦外部事三十年矣其他或自使館隨員參贊升入外部或自外部出爲公使又由公使入爲侍郎尙書者不

可以更僕數。蓋職業專則志壹而不雜。經畫久則才練而益精。所以西人辦理交涉。措注周詳。鮮有敗事。閱歷使然也。中國自文文忠公而後。總理衙門大臣。萃畢生之全力。以經理交涉事務者。殆鮮其人。或以官高掛名。或以淺嘗自喜。或驟出驟入。聽其自然。一聞海國圖志。瀛環志略兩書之名。尙有色然以驚者。謂景秋坪尙書或又有
一二清流。如李高陽閩朝邑兩相國。皆自謝爲不知洋務。以終年不一至衙門爲高。至於章京考取之券。皆以小楷。固有居署十年。尙於洋務不甚通曉者。其或號爲明敏出色之人。不過取能了日行公事而止。若既了公

事而又稍通洋務。則其人固更出色矣。則必由章京而
管股。而幫辦。而總辦。如是者十年。而不簡放關道者。則
羣相與目笑之。故在署十年。而稍習公事。無不得關道
以去矣。迨既得關道。而外升藩臬。內升京卿。又不復入
總理衙門矣。如是而欲洋務人才之練習。其可得乎。如
是而欲辦理洋務之不至於歧誤。其可得乎。吾是以謂
中國欲圖自強。必自精研洋務始。欲精研洋務。必自整
頓總理衙門始。欲整頓總理衙門。必自堂司各官久於
其任始。

初五日記

希臘居歐洲極南。在赤道北三十六度十分至三十九度五十分。英京東十九度三十分至二十六度三十分。北界土耳其。南界地中海。西界挨愛阿內海。東界伊直安海。在北有海拉斯屬地。爲土耳其舊境。海拉斯之南有馬里士股。卽土耳其之剔力坡里舊省。希臘全境皆山。大島曰拉哥羅澎。在國東北界。近大土海峽。中分狹處不滿一英里。曰坦崙泰。曰澳里阿。其餘小島無數。通國居民一百四十五萬七千八百餘人。京城名雅典。居民一萬六千八百餘人。全國水陸軍二萬八百餘人。國教以希臘本教爲最盛。從者十分之九。

初六日記

西人嘗謂謀國之要有三。曰安民。曰養民。曰教民。所謂養民者何也。蓋查地球中版籍之數。大抵每年一百人中。必添一口。歐洲人民約三百五十兆。每年可增三百五十萬口。中國約四百兆。每年可增三四百萬口。苟無新法以養之。則必有人滿之患。何以養欲而給求耶。按西國養民最要之新法。條目凡二十有一。一曰造機器。以便製造。二曰築鐵路。以省運費。三曰設郵政局。日報館。以通消息。四曰立和約。通商。以廣商權。五曰增領事衙門。以保商旅。六曰通各國電綫。以捷音信。七曰籌國

家公帑以助商賈。八日立商務局以資講求。九日設博物院以備考究。十日舉正副商董以賴匡襄。十一日設機器局以教閭閻。十二日定關口稅以平貨價。十三日墾荒地以崇本業。十四日開礦政以富民財。十五日行鈔票以濟錢法。十六日講化學以精格致。十七日選賢能以任庶事。十八日變漕法以利轉輸。十九日清帳項以免拖累。二十日開銀行以生利息。二十一日求新法以致富強。

初七日記

西學之最有用者曰幾何學化學重學汽學熱學光學

聲學天文地理學電學兵學醫學動植學公法學律例學英報云俄國所造之烏蘇里鐵路工人有一萬二千其中監犯一千四百軍罪之人一千六百兵二千一百俄人三百華人與高麗人六千此處鐵路爲西伯利亞之東段現已興工所有造車棧電局各料亦已齊備今秋可造成一百啟羅邁當

初八日記

從前西洋各國受制於教王當教王勢饒最盛之時幾操廢立各國君主之權而各國之民信從教王殆如水就下如蟻附羶也自耶穌教另樹一幟以與天主教爲

敵歐洲各國之民。因爭教而互相攻戰。互相殘殺。至數十百萬人之多。搶攘不靖者數十年。繼乃定爲各行其教。有不相菲薄。不相師之意。然天主耶穌兩教。隱然勢均力敵。而教王之勢驟衰。邇來愚民信教之心。似不如前。而各國君相。亦能實事求是。力圖自強。教王之教。不足以愚之力。又不足以勝之。卽素崇天主教之國。如法義德奧諸大邦。無不創立新法。限制教民。教王固熟視而無如何也。教士懾於國家之威。無不謹受約束。恪守準繩。惟其前往中國者。不能人人如在其本國之馴謹。而中國與法國所立條約。旣授以保護天主教之權。中

國稍欲裁制教士。輒爲法之外部及駐華公使所格。卽使情理兼足。法人明知我當行之政。然彼既欲要結教士之心。又欲自示其權力之大。故無不壹意沮撓者。自是中國竟無法以治教士。而教士之恣規錯矩者亦愈多。而愚民之蓄疑積忿者。遂一發而不可遏。迨巨案既起。教士赴愬於法使及領事。法使必先藉端挾制。以增其本國之權利。再以保護教務之名。爲教士多索利益。以饜其求。其有清查教堂之法。如中國所宜整理者。法人雖勉允一二。教士亦知法之隔在鄰國。威令不行。且知非出法人之眞意。亦竟置之不理。此中國教務之所

以日棘也。近時議者遂有請教王遣使之說。冀以隱分
法人之權。萬不得已之補救。亦祇可如此。然經營稍不
得訣。恐一弊去而一弊復生。余今雖籌辦此事。蓋兢兢
焉不敢不慎也。

初十日記

美國製造兵船有廠十處。曰霸子塢。曰指而斯富。曰北
羅筆林。曰阜立特非亞。曰離島。曰紐倫敦。曰華盛頓。曰
拿福。曰奔色哥拉。曰曼爾島。西歷一千八百八十年
美國舊金山一埠。旅居華民二萬一千七百四十五名。
迨一千八百九十年。核計共得二萬五千八百七十名。

十年之中。苛例頻仍。而反增華人四千有奇。似皆久居
美國之民。生育所增之人口。否則或由美國別埠而往
者也。中國之以詐擾嚇騙爲事者。天津謂之混星子。
甯波謂之空手人。上海謂之流氓。廣東謂之青皮黨。蘇
州謂之破靴黨。而英法諸國皆無之。則以多用巡捕之
功也。

十四日記

德前相畢士馬克佐德前皇。敗丹蹙奧。蹙法。由普魯士
王爲日耳曼共主。晉號德意志皇帝。國勢遂與英俄鼎
峙。亦古之豪傑者流也。前皇已封爲郡王。平章軍國重

事年逾七十精神矍鑠前皇旣卒太子卽位越兩月卒其子又卽位卽今皇也當畢士馬克用事時前皇言聽計從端拱無爲而已太子娶英皇之女爲妃才性敏慧不能相下畢相亦稍稍裁抑之迨今皇卽位英女爲太后今皇聽其母之言稍與畢相不相能畢相亦恃功挾長有視今皇爲孺子之意今皇性頗剛愎自用益相齟齬畢相遂於光緒十六年春致仕而歸然素性喜任事不甘廢退頗譏議朝政並以其輔佐前皇時之深謀密計漏洩於外致國家大受不便德皇固已心銜之矣今年春畢相之子小畢士馬克曾爲外部尙書者娶奧國

女爲妻。赴奧成婚。畢相亦命駕如奧。奧人以王禮迎之。士女夾道瞻望丰采。聲華之盛。傾動一時。前此德皇過奧時所不逮也。俄人復使新聞館主執筆以隨之。日日謁見畢相。訪問從前弼成皇業之事。畢相頗盡言不諱。於是一切秘密事情。及稍不滿於今皇之語。俄人皆登之報章。且加重其語氣焉。德皇見之大怒。亦令報館登報答之。且云畢相若再出言不慎。當削其王爵。沒其田產。勿謂國家寡恩也。畢相始婉謝賓客。稍務韜晦。還居別墅。近聞德皇又與畢相和好如初。然恐貌從而未必心慊耳。

十六日記

去歲新金山之維多利亞埠出金五十九萬七千六百二十九兩。較前年少出一萬一千兩。英國天文官稱今年太陽內有許多黑點。約長十萬英里。廣六萬英里。當今生意之壞。雨水之多。皆由於此。其黑點之大。向所罕見。

十七日記

去年印度編查戶口。共有二萬八千八百十五萬九千六百餘口。內英屬之印度。計二萬二千一百三十五萬六千餘口。土王所轄各邦。計六千六百八十萬三千餘

口其人如以教門分類則有印度人二萬零七百六十五萬四千回民五千七百三十六萬五千天主耶穌教民則有二百二十八萬四千不奉佛教之哲納人則有一百四十一萬六千益札布之希克則有一百九十萬七千佛教七百十萬一千餘人火教八萬九千八百餘人猶太教一萬七千一百餘人居住樹林畜牧之人九百三十萬二千

十八日記

米利堅合眾國全境天然形勢分四大地其濱大西洋諸邦分三段一爲新英吉利諸邦曰緬曰紐罕什爾曰

法滿的。曰麻紗朱色土。曰洛哀倫。曰干捏底吉。二爲中大西諸邦。曰紐約。曰紐折爾西。曰賓夕爾勒尼安。曰馬理蘭。曰特爾拉華。曰哥隆比亞。三爲南大西諸邦。曰勿爾吉尼阿。曰西勿爾吉尼阿。曰北喀爾勒那。曰南喀爾勒那。曰若耳治。曰佛勒爾佛釐是也。內地諸邦分二段。一爲北內地諸邦。曰仄的伊。曰倭海阿。曰英釐安納。曰密執安。曰亦倫諾爾。曰威士干遜。曰密蘇爾釐。曰衣阿華。曰密內沙太。二爲南內地諸邦。曰阿拉巴麻。曰密士失必。曰魯西安納。曰阿甘色。曰田納西是也。西高原諸邦諸部分二段。一爲平原諸邦諸部。曰得撒。曰因底阿。

番部曰坎散斯曰內勃拉斯喀曰特考太部二爲落機
山諸邦諸部曰考洛拉度曰新墨西哥部曰回華明曰
芒退那是也濱太平洋大地諸邦諸部曰開爾福尼亞
曰納未達曰阿里顏曰華盛頓部曰阿度化曰阿立尙
那曰由塔是也

十九日記

華盛頓崛起美洲創立民主之局但合眾小國以成一
國故有合眾國之名稱美理駕國者以其在美洲也其
國旂多花文故又稱花旗國在南北美洲爲最富土地
肥沃全境惟亞蠟斯干一作安屬部居寒帶餘悉當溫

帶坎拿大在其北。墨西哥在其南。東濱大西洋。西臨太平洋。東西陸地廣約二千五百英里。南北疆域長約一千七百英里。幅員之大。計三兆五十八萬五千七百九十英方里。適與歐羅巴全洲相等。自美購得亞蠟斯干新地於俄。擴地乃益廣焉。戶口之數。白民四十三兆五十萬。他種黑民六兆五十八萬一千。土民僅三十二萬二千。土民卽土番也。雖屢經逼逐。死亡眾多。然攷英人開土以前。其類本不甚蕃衍。近年土番僅二十五萬多。在密士失必江之西。種類不一。可分而舉之者。曰喀里克斯。曰卻洛凱斯。曰蘇。曰考克叨斯。曰叨凱少斯。

二十日記

拜發與英外部商議會立坎巨提新酋一摺密陳帕米爾事宜一片。美國天氣北境夏暑溼而冬嚴寒多雪。南境濱海處入冬和暖幾似熱帶矣。全地廣土肥饒民多務農勤於耕作。其南產木棉煙糖。其北產麥玉蜀黍。樹木亦富。礦產尤多。各機器廠日漸增廣。國內各教無所不備。國家待之無所軒輊。而以耶穌教爲大宗。正副伯理璽天德皆由通邦選立。四年一任。有議士院及元老紳董兩院。更有審院。分三等焉。生聚至四萬人。則建築城邑爲一部。附於眾邦之後。民數滿額。准其自立爲

邦同列盟會。水師多與商船相表裏。其鐵艦則圓活礮臺居多。俗稱冒尼叻是也。通國分邦三十八。屬部八番部一。每邦各有議院及統領一員。國內產棉。每歲約一千兆磅。運英國者七百兆磅。進口貨爲羊毛冬布竹布生銅銅器鐵糖加非茶酒。出口貨爲棉花麥玉蜀黍乾麵煙木料柏油牛乳餌醃豬肉牛肉。計進出口貨之價。皆逾英金一百五十兆鎊之數。國中歲入之款。約英金六七十兆鎊。歲出之款約五六十兆鎊。此就總政府言之。而各邦歲入歲出之款不與焉。

二十一日記

美國通商口岸曰紐約曰摩士敦曰非勒特爾非爾曰勃耳惕莫曰紐澳良斯曰查爾士頓曰磨比勒曰三藩謝司戈即舊金山天下講商務之國英爲最法次之美又次之東北諸省爲商埠及製造各廠所在其南其西諸省則耕植爲宜鐵道縱橫四關計其十萬英里惟其中單道爲多往來一道工築亦粗而需價則更倍於英國所築者焉國債當南北未戰之先僅十五兆英鎊今驟增至四百兆鎊而各邦亦自有公債

二十二日記

俄兵之將赴帕米爾也其外部先告駐俄英使云阿富汗

汗既奪布回之羊以當貢獻而華兵仍駐紮艾力雀爾
帕米爾是以俄政府將遣遊擊喬瑞夫率師巡帕大約
西八月之前可歸但此行並無據地之意不過探視情
形而已且冀阿富汗因俄師之來不再與布回爲難而
華兵或因此可以撤去聞六月十二日雪姆拉地方來
德電報云俄兵分三隊入帕阿富汗兵在蘇滿者百人
聞俄兵將至連日夜添兵三百而俄兵三十人貿然而
來與阿兵戰俄兵被殺五人被擒二十五人俄人索之
阿人不與十九日來德報云俄阿之兵鬪於尼柴塔什
帕米爾未知勝負如何又云俄兵已至華界之阿克塔

式而駐紮郎庫里湖之華兵似已被俄兵逼逐撤退於
是倫敦新報議論騰起而英外部亦謂俄廷前說恐不
足信若中國不及早理論恐竟乘機占地云

二十三日記

輿地之學恃乎測繪由來尙矣晉裴秀製圖條陳六體
曰準望曰高下必賴乎測曰方邪曰迂直復需乎繪曰
道里曰分率尤藉乎算是測繪算三事爲作地圖者所
必需也唐賈耽曰地理之學百聞不如一見又云十說
不如一圖周官大司徒以天下土地之圖周知地域廣
輪之數職方氏掌天下之圖以掌天下之地要近今作

圖更精於前而測繪之法尙不如西人之美備其故有三焉一測繪之業無如西人之專也或測經綫之弧或測緯綫之弧或測全洲或測一國或因航海以識行程或因游覽而知指向爲事既繁練習自多一測繪之器無如西人之精也測天度則有經緯儀紀限儀測地面則有測平儀羅盤儀測時刻則有千午儀日晷儀而經緯儀之精平立二圈小則徑三四寸大則徑三四尺製配甚準分度極細一周三百六十度度六十分分六十秒規制精良爲用自準一測繪之法無如西人之詳也中國測地以勾股爲主西人則以三角爲用其法於平

面上測定底綫再從底綫之兩端測得物點如是則各物點與底綫兩端之相距並物點彼此之相距皆可推算而知。

二十四日記

英國向分公保兩黨公黨之首爲葛蘭斯登保黨之首爲沙力斯伯里沙侯相英六年國人悅服惟議院員紳向係七年一選今年值選議員之期數日前各處推選甫定而公黨之被選者多於保黨約四十人於是沙侯告退葛蘭斯登爲宰相阿斯奎次爲內部尙書勞特勞特二字係侯伯子勞思伯力爲外部尙書勞特金伯雷克郎男爵之總稱

舊之為印度部尙書兼軍機處正尙書堪白爾班納門

為兵部尙書男爵侯失勒為刑部尙書福婁為工部尙

書門得拉為商部尙書孝勒莠埃為農部尙書埃瑠爾

馬萊為郵部尙書馬蘭一譯作麻雷為阿爾蘭部尙書德來

維林為蘇格蘭部尙書勒塞爾為總狀師烈葛佩為大

狀師勞特好敦為阿爾蘭總督伯爵施丙色一譯作施本守為

海部尙書寶星韋廉哈谷德一譯作哈可脫為戶部尙書侯爵

利木一譯作爾立本為藩部尙書福辣為地方官尙書阿克倫

為軍機處副尙書阿克蘭為上議院副首領兼學部尙

書

二十五日記

近世人情多震驚於西洋風氣之奢豪。器物之精緻。以其能順人意趣。適人嗜好也。是固然矣。然余謂亦有洋不如華者。中國饌席。山珍海錯。無品不羅。乾溼酸鹽。無味不調。外洋惟偏於煎熬一法。又擯海菜而不知用。是飲食一端。洋不如華矣。中國綢緞綾羅。男女各用以章身。均極華美。至於冬裘。百獸之皮。無所不用。尤覺異常燦爛。洋人不論貧富貴賤。皆以黑呢爲衣。旣短且緊。大不登樣。婦女製衣。雖多奢費。然亦僅於茶會用之。且究不逮中國婦女服飾之百一。是衣服一端。洋不如華矣。

中國房屋起於平地。輔以亭臺樓閣。乃有玲瓏曲折之觀。每平屋一進。皆有天井。於是假山奇石。曲檻清池。名葩異樹。可以隨宜布置。外洋專尙四五層之樓房。而別無他式。雖名爲宮殿者。不過樓房高大而已。尤乏趣者。縱有絕堅緻之樓房。而全宅中無一天井。不過四面皆臨街衢。以街衢爲天井而已。是宮室一端。洋不如華矣。夫飲食衣服宮室。人生日用之最大者。而外洋皆不如中國。然則智者。慎毋震驚於西洋之風俗。以爲事事勝於中國也。

二十七日記

中國欲振興商務必先講求工藝講求之說不外二端以格致爲基以機器爲輔而已格致如化學光學重學聲學電學植物學測算學所包者廣得其精則象緯輿圖律歷皆能深造有得得其粗則亦不難以一藝名家既須多設書院選聰穎子弟肄業其中而藝術學堂亦不可不設也機器能以一日之力成十日之功一人之力代百人之功如是則貨價必廉價廉而銷售始暢矣而所以擴商務之用者則尤有八焉一曰設專官如西洋各國有商部尙書以綜覈貿易之盈虧又有商務委員以稽查工作之良窳是也一曰興公司興之之術不

外立保護公司之法。議整頓公司之規而已。一曰勵新法。有能創一藝者。給以憑單。俾得專享其利。則才智之士。無不殫精竭能矣。一曰杜偽品。中國絲茶之不振。半由洋人仿造。半由姦商肆其詐偽。有攙雜假託諸弊。以致貨真價實者。亦受其累。今宜懸明法以禁之。又使諸商公議。罰辦之規條。行之數年。庶有孚乎。一曰趨時尚。凡物能變新樣。必可善價而沽。而眾耳俗目之所好。尤不可不投也。一曰設賽會。仿英法德美日本辦法。建設會場。羅列珍奇。所以廣見聞。資則效。開風氣。旺貿易。法至良也。一曰改稅則。宜乘各國換約之時。漸改值百抽

五之例。稍重洋貨進口之稅。則而於洋酒洋煙之稅。更加重焉。絲茶二項。宜稍輕出口稅。以減成本。而廣銷流。一曰導商路。招商局輪船。既已暢行江海。宜漸多置輪船。派往南洋諸埠。以及外洋諸國。裝貨搭客。稍分西人之利。而華民之旅居外洋者。亦得聲氣聯絡。裨益豈淺鮮哉。

二十八日記

光從日發。或由亮體射回。入人目。則覺爲光。如月受日光。映回入目。則見爲月也。凡光一帶。或一綫。能分七綫。各綫能使目覺有不同之色。各色並合入目。則覺爲白。

是白爲光之合。而色爲光之分。如將七色依次繪於輪
邊。速轉之。則勻和而顯白色。無白色。則爲黑色。因無回
光也。如欲將光分爲七色。法用數寸長之玻璃條。成三
稜形。謂之三稜鏡。托以架。置於暗室。或於門。或於窗。鑿
一小孔。透進日光。使過三稜鏡。射於素屏。則屏上備呈
七色。由下而上。初紅。次橙。次黃。綠。藍。靑。紫。各色寬窄不
同。如將其光色帶勻作百分。則紅居十一。橙居八。黃居
十四。綠居十七。藍居十七。靑居十一。紫居二十二。凡人
目後有眼腦衣。乃腦氣筋細夾於二細膜間。面平滑。人
活時。其衣能明光入。日之光色。必先達此明衣。由內面

回至外面人始能見如光久遇腦衣一處則衣漸失知覺必有相反之光色始易見之因目正看一物而不移動則其物光色漸令腦筋乏力必移目轉看他物腦筋始能再顯其力故凡細看一物者必移目改觀使其形不專注腦筋一處否則腦筋乏而看不真矣

二十九日記

天上之電無異人工所作之電天上何以生電有云因天氣與地磨擦而生者有云因草木生長變化而生者此說無據有云因太陽蒸水化氣而生者有云因空中之氣與水磨擦而生者細察物理大抵空中之電因太陽蒸

海水化爲溼氣。遇空中之風。彼此互相磨擦。卽能生電。但其力量大於人工所作之電耳。天上之電。其類有五。有一種電。俗名立閃。白光一道。長約數里。狀如蛇行。似有旁岔。常在陰雲厚處。雲內電性最大。天氣不能阻。電或與他雲相觸。或與地面相感。皆立放電發光。最能震人致死。身有傷痕。電發之味。如屋內旋轉生電機所嗅之味。因電感空中養氣。以致養氣縮濃。養氣一縮。其味卽出也。此電能劈沙地。或劈鐵條。亦能將鐵條感成磁石焉。又一種電。光發一片。每有光彩。有藍色。深紅色。紅青色。在二雲相觸處見之。不關地面相感也。因同時有

雲數萬處。所以發光成片也。其力不甚猛烈。雖偶震人致死。然不常斃人也。又一種電。俗名露水閃。夏夜有之。而無雷聲。大約電發在天邊之外。因發電之處太遠。故雷聲不能到耳。所以見光者。天邊有雲返照故也。又一種電。西國名爲雷彈。狀如火球。即天火落地上。躍炸裂之聲。聞之甚遠。勢甚危險。每致轟人。有云因空中溼氣感雷。愈聚愈濃。濃氣由雲際下落。漸漸墮地。每歷十秒之久。日能視之。又一種電。航海桅頂。常見發火是也。軍行時。士卒執長槍。槍尖每見發火。此二者。均雲際所感而然也。

七月癸亥朔記

雷喜入臨近之物。又喜入通電之物。如高山高樹高樓船上高桅。以及五金之類。皆能引電。故雷發時。人不可憩於樹下。宜入屋避之。亦不可在平原曠野。因四面俱平。一人獨立。亦能引電。每致危險。野獸被擊。職是故也。如人執鐵器。適遇雷電。宜擲遠處。卧地以避之。至於臺閣樓塔。宜用防雷尖。以避雷電。其安設尖。以之法。有八要焉。一。質宜用通電之物。銅雖通電。其實太脆。不如用鍍錫之鐵。可免生銹。一。鐵質宜粗。以免電過被焚。一。鐵由房頂。以至入地。宜接爲一條。不可隔斷。一。鐵宜

直入地不可彎曲。入地宜深。若通至潮溼近水處尤佳。一鐵頂宜銳尖。宜鍍白金。以免生銹。尖鈍一鐵尖宜出房頂高數尺。一安爻之處。宜距房上他處之鐵較遠。八事備而雷電可避矣。

初二日記

格致彙編云。天地之成。有一定不易之理。亦有一定不易之例。實有無所不能之天。主宰於天地未有之先。匠心獨運。默定權衡。故天地皆依次而成。先爲氣質。繼爲流質。因旋轉而成球形。其後流質又成定質。再後則地殼分水陸。陸地成泥土。而植物生焉。植物生後。又生動

物最後人類出焉。苟非無所不能之天。主宰乎其間。安能若此。有條不紊哉。又云地球未成之先。本與日球爲一。因旋轉之勢而分。始分時爲極熱之氣質。漸涼而成甚熱之流質。再涼而凝成定質。卽地球之外殼是也。殼外皆水。水上皆氣。其氣較今之空氣更爲濃厚。又云地球初成。外殼皆水。本無陸地。然外殼雖成定質。而其內仍爲甚熱之流質。外殼漸涼漸縮。流質被其擠壓。因將外殼湧起。高出水面。卽成陸地。其地甚小。如海島然。陸地初成。皆爲石質。並無泥沙。其後歷受波浪之衝擊。空氣之侵蝕。與冷熱之漲縮。於是極熱之石。變爲石子。石

子漸變爲細沙細沙漸變成泥。

初三日記

格致彙編云。地之所以爲地。如五穀之種。其生也必由芽而苗而秀而實。又如雞蛋。其中之黃白。本係流質。得母雞之熱。漸成小雞。地球之逐漸結成。亦猶是也。故地能成今日之地球。必已歷千萬年之久。又云。地學家之查攷地殼者。知土石皆有層累。最古者在底。漸近則漸上。在底層所留之物迹。動物則肢體未分。植物則枝幹未備。而品亦極賤。漸上則動物之迹。肢體漸分。植物之迹。枝幹漸備。而品亦漸貴。植物初生。如莓苔木賊鳳尾。

大葦等類而海中亦生海藻厥後種漸變品亦漸尊乃生松柏檀楠等貴重之物動物則水中先有珊瑚蛤蜊之類而後有魚陸地先有蛙與鼃之類而後生飛禽再後生走獸最後始生人爲萬物之靈

初四日記

地學家論地殼之厚薄其說不一或謂六十里卽英里二十或謂六百里卽英里二百而人祇能掘深三里故未能得其確數若地殼厚六十里則較之地中流質同爲甚薄猶蛋殼之與黃白蓋地球對徑二萬四千里卽英里八千其殼祇能得四百分徑之一若地球與蛋同

大則殼較蛋爲愈薄矣。地球初成其外皆水。故水成石平列地面。毫無欹側。然地中之流質。時有變動。地殼亦從而改易。高者忽塌。低者忽湧。故水成石有豎列有斜列。有平列。其行列雖不同。而層累秩然不紊也。海除魚鹽之外。其大用有三。一使陸地不至甚冷。日光曬於地面。受熱易散熱亦易。海水受熱難散熱亦難。空氣卽傳其熱。故陸地可不甚冷。二爲雲爲雨。以滋生禾稼。三爲水之總匯。免泛濫橫流之患。而利舟楫。便商賈。抑其次也。

初五日記

法國耕種之民漸少。而出產尙佳。又能用器具以合土地之宜。故地價較二百年前已增四倍。然農務究不如工商之有起色。而葡萄爲法出產之一大宗。五十九府內皆有之。畜牧之政亦日見蕃盛。通國牛有一千一百七十二萬餘匹。馬二百七十四萬餘匹。礦產除鐵之外均極稀少。而工藝所出之物亦爲大宗。有不用人力之手工。或用氣力。或用水力者。而紡紗局織布局織呢局造紙局各有數百處。每局有機器各數百架。商務因其地三面臨海。產物亦盛。故能暢旺。通國鐵路有二萬二千七百七十六啟羅邁當。

初六日記

英開四尺八寸半寬之鐵路。如每碼重五十五磅者。而所鋪硬石等料。深十五寸至十八寸。則每英里長五千二百八十英尺。其價金錢四千五百員至五千五百員之譜。此輕鐵路也。又如鐵路重而堅實者。每鐵條一碼重七十五磅。所鋪堅石等料。深二十四尺。其價每英里金錢五千五百員至七千員以上之價。所有工程一切在內。卻不包地價在內。亦不包客車貨車汽車在內。但包停車場房屋并鐵路橋梁而已。至各國所造之單軌鐵路。每一英里。以金錢七百至一千員。足敷備常用之。

各種車輛。又如山中開洞。每長一碼。約價以金錢二十五員起數。或至四五十員不等。如造尋常雙軌鐵路。則穿山所開之洞。每碼需金錢四十員至九十員不等。其工價之貴者。每碼金錢逾百五十員。凡造雙軌之路。較之單軌者。每費百分另加五十分。或至七十五分。其預備房屋車輛之費。雙軌比單軌。不過加費百分中之十分。或至三十分。如果貿易暢旺。自以雙軌爲合算。

初八日記

器因時轉。人隨事遷。將來西國陸戰之法。必更日異月新。一鐵路日增。與戰事大有關係也。同治九年。普法之出使日記續刻

卷五

三 傳經樓校本

戰軍士火器糧餉皆能速運。皆得鐵路之益。三十年前南北花旗之戰。已知每興兵十萬。用單軌鐵路。每長一英里。應有汽車二十五乘。貨車六乘。在交戰時。鐵路運物料往。載傷兵回。又須運兵往戰。且運糧與軍火。恐不敷周轉。故單軌必改雙軌。尤妙。又必使兵能自成鐵路。而自理其各事。愈妙。故各國每遇戰時。皆派兵若干營。專理鐵路之事。而又必專謀設法。以毀敵之鐵路。須有馬兵數千。或直衝敵前。或繞其左右。以毀其鐵路馬路。電綫糧食軍火等項。則事半功倍矣。一電燈宜用也。兩敵相持。遇夜可燃電燈。以照於緊要之路。防敵劫營。或

潰圍之舉。如有攻城已擊破者。夜中能照其破處。如見人修補。卽用羣子彈擊而散之。

初九日記

一輕氣球宜精研也。氣球創於百年之前。法國戰事初用其器。後閱七十年之久。視爲廢物。三十年前始復興。用一千八百五十九年。意國之戰。及南北花旗之戰。與德師困法京。俱用氣球。近十年前。始更精求其理法。以便多用於戰事。惟今所放氣球。仍用繩牽而鬆放之。氣球尙未多進益。近來法國於其電氣機器。考求益精。將來或能造船形氣球。迎風逆氣。或借旁風而速前行。則

或藉以請兵解圍。或通信營壘。其益最大。一火器宜講求也。近來放槍放礮。最速最遠。用藥無煙。燃放無聲。可謂精矣。數年前礮兵皆謂放礮多於二千五百碼者。已屬無用。以目力所難到也。邇者試放尋常礮彈七箇。所落俱在五十尺寬之方內。量其相距。知爲三千三百碼之遠。德國礮兵以爲距三千八百碼。尚可命中。如用最精千里鏡。於天氣清明時。地形合式。彈能及二英里半之遙。攻擊密列之步兵。因此知步兵離敵礮約三英里。卽不宜密布成隊。須疏散排列。又可見成陣布列。必在距敵三英里以外。方爲穩妥。步兵雖能放槍命中於千

三百碼之遠。又能燃放最速。阻撓敵兵。使不及放礮。然若有礮二副。則每分時放礮彈三四箇。足擊敵營。使其兵馬靡亂矣。

初十日記

近有新法用無煙無聲火藥。燃放槍礮如兵藏籬內。或密樹後。連放槍數分時候。敵軍已斃多人。而無從辨我軍之所在。後護兵與分用小隊兵。能用此種火藥。則敵人不知攻擊所在。更可得利。且藥既無煙。敵手槍手。瞭敵更易清楚。攻擊必準。而槍礮之害。較前更烈矣。有英德武員討論攻守之事。究竟孰利。德員謂利在攻者。

英員謂利在守者。德員云。臨陣之時。如及於備擇所守之方位。則前行之兵。可掘壕塹以護身。或據所有泥堆溝壑以遮身。如不及備擇。則兵可不卧地面。藉地稍凹凸處以資蔽護。如此則敵兵最難放槍命中。英員云。守者能豫知各處相距。或用鏡測。或用尺量。其相距處。或石或小河。或路或泥堆等。敵兵向前進。必露全身。則可放槍縱擊。且敵兵行動時。足趨手動。方位常改。測望頗難取準。又執槍不穩。難以命中。此皆攻兵失利之處也。

十一日記

暹羅之地。自赤道北四度三十分至二十度。值京師西

九度十七分五十八秒至十八度十七分五十八秒。按飛鳥道東西一千六百十七里有奇。南北三千五十四里有奇。然論其國版圖。祇自赤道北十二度起至十七度止。並有瀕海各地。此外暹人老撾各部落。以及柬埔寨之西南。麻刺甲之東北。或土番。或小國。雖屬於暹羅。不過一年一貢。而其地與民。皆歸土王及酋長管轄。暹者英取緬甸。法取越南。土酋皆不能自主。暹人亦懼其逼也。乃遣官分駐其地。爲之保護。所有公牘往來。皆由暹官與土酋會同商酌。加鈐印信。方可通行。每歲進款洋銀一千萬員。多則一千五百萬員。有各屬貢品。地丁

錢糧房稅船稅雜稅綜計居民有一千二百餘萬人。凡暹羅土著三百五十餘萬。華人及暹產華種亦三百五十餘萬。老撾人三百餘萬。緬甸越南柬埔寨日本印度巫來由及各種土番共二百餘萬。

十二日記

暹羅於乾隆三十七年推鄭昭爲王。由猶地亞遷都曼谷。一作萬國今譯作邦考克光緒十一年暹羅入泰西各國之郵政會安設電綫南始曼谷北止景邁中通各城又東至西貢西接下緬甸其有電綫五千一百四十里有奇近且議造鐵路自曼谷至哥賴脫長四百九十餘里土地肥

沃尤宜稻而易熟。稻凡四十餘種。渭南江之水。歲以五月漲。八月退。淤泥泛溢。糞田極肥。每歲出米九千一百萬石。又產香漆。象牙。犀角。牛皮。茶葉。煙葉。藤黃。藍靛。沙藤。木棉。苧麻。橡膠。包穀。芋薯。沙穀。米。粟。粟花。甜瓜。黃瓜。李。橘。荔枝。椰子。菜蔬。花生。榨油。甘蔗。製糖。竹器。竹席。各物具備。其樹木質堅材巨。如楠木。烏木。文木。鐵木。松柏。以及蘇木。黃木。染料之木。皆有之。其礦產鐵。錫。寶石。鳥則孔雀。山雞。野雉。鷹。鴉爲多。沿海山洞。海燕造窩甚夥。爲南海珍品。厥獸多象。馴馴驅使。人家皆畜之。白者稱靈獸。又有虎。豹。犀。熊。箭豬。水牛。紅角野牛。狼。狐。猿。獾。麝。

出使日記續刻

卷五

老 傳經樓校本

鹿黃羊海驢灰鼠之屬。每歲曼谷出口貨值洋銀二千六萬員。進口貨值一千六百四十四萬員。

十三日記

倫敦夏間極熱之時。可御單衣兩層。而紗葛無用也。冬間極寒之時。可御棉衣兩件。而重裘無用也。然英人夏必居海口。名爲避暑。冬必居海口。名爲避寒。凡達官富商。於海口及鄉間名勝之區。皆有別墅。其通年居倫敦者。不過三四月。大抵海口及鄉間。天氣晴爽。迥與倫敦不同。西洋醫家又謂海氣於人之養生有益。人能多吹海風。多浴海水。則精神爽健。身體堅實。故無論貧富貴。

賤皆以避暑避寒爲名。而命意則在多受海氣。兼以遊目騁懷。至於避煤煙。避昏霧。避人戶稠密之濁氣。尙其次也。習尙相沿。浸成風俗。而避暑尤亟於避寒。儘有無力避暑之人。杜門不出。客至則謝以避暑。下鄉者是不在得其名。而先欲襲其名矣。然倫敦每至春杪夏初。卽通衢亦稍覺寂靜。約計人民十少六七。但見輜重纍纍。無慮皆避暑者也。余到倫敦兩年。未嘗鄉居。今歲倫敦降霧獨早。閏月以後。卽連日陰雨。余姑從宜從俗。議避暑七日。先於英倫之迤南租定房屋。下午四點鐘挈眷及繙譯武弁各一人。赴維多利亞車棧。四點半鐘火車

開行。共行五十英里。五點三刻鐘抵白雷敦海口。此處亦英之名勝地也。有小倫敦之稱。戶口十一萬五千。高臺巨廈。櫛比雲連。凡避寒暑及遊覽者皆必至焉。

十四日記

余與繙譯王省山乘馬車周行白雷敦街市。此鎮東西長而南北短。由極東至極西約四英里。南北僅一英里有半云。又至海邊舊隄。納受海風。此隄在街之東隅。南面陡入海中。長約半里。蓋植椿於海灘。復以鐵練駕木爲之。而鋪土於木上。其隄之盡處則用石砌。基勢較寬。可列坐數百人。或千人。有樂工一班。奏樂以娛遊客。凡

到此者。每人須出本土二枚。西望相距約一英里。有一新隄。而新舊兩隄之間。又有新築一隄。工程尙未及半。洋人之說。每謂海濱雖可多受海風。尤不如在海中者。四面爲海氣所涵。獲益更多。故必築隄突入海中。以憩遊人。大抵皆集股所爲。而收遊費以償工本。余以已正往。至未初而返。但見海邊習鳧水者甚多。大半皆係婦女。蓋謂身體沾受海水。可以一年無病。其餘則有駕小艇者。有放小火輪者。溯洄遊泳以爲樂。

十五日記

余與王省山赴新隄納涼。新隄在舊隄之西。其長與舊

隄相等而寬闊約四倍之。惟無土石而專用木板。其下亦密釘木椿。人行其上。轉覺穩固。又有水族院在海濱。凡海中鱗介羽毛之族。羽族如鸛鷀之類。毛族如海狗之類。無物不有。較倫敦水族院尤爲完備。多有奇形怪狀。生平所未見者。有一種鳥分張兩翼。飛於水中。蓋形似鳥而實魚也。卻又與飛魚不同。有一種魚下生六足。能游水中。亦能行水底。又有一物專以蟹爲糧。平時在水中蟄伏石間。不動。見蟹至則追捕而食之。其行甚捷。既不似魚。又不似蛇。亦難辨其頭尾。口。卽有七八蟹在前。能並捕而齊食之。霎時間噴出蟹殼。徧體有大小數十百管。能自閃

動似係呼吸者。聞係來自美洲云。

十六日記

余與王省山赴小花園憩覽。旋乘馬車遊潑辣斯登派克。派克者譯言園林此地局勢寬展。林木蔥蔚。布置甚爲佳勝。

遂繞至大野克特拉意甫。縱觀村景。蓋其地踞白雷敦山崗之脊。登高遠矚。後面鄉村一帶風景悉在目中。又到聖愛恩斯懷而觀一古井。愛恩人名也。懷而譯言泉源也。傳言飲此水者。一歲中筋骨強健。來遊此者頗多。來者每人須出三本土。購水一瓶者價四本土。省山飲水半杯。據言味稍苦。亦微有鐵氣。余不敢飲也。此間

夜半後尤涼。非擁厚棉被不可。然聞冬令亦不過如是。故避暑避寒皆必到此。大抵水性無甚寒甚熱。冬夏一律。冬間水面爲寒氣所侵。不免結冰。然愈下則愈覺其暖。非真冬水之暖也。以與隆冬冷氣相形。則覺其暖也。夏間水面爲炎日所曬。不免發熱。然愈下則愈覺其寒。非真夏水之寒也。以與盛夏暑氣相形。則覺其寒也。夫天氣有寒暖。而水氣無寒暖。海乃水之所歸宿也。則海濱之便於避暑避寒也亦宜。

十七日記

明日爲與外部印度部會議滇緬界務之期。余前已派

馬清臣往議兩次。尙未就緒。約計必再會議數次。方有眉目。余因發電召清臣來此面商。告以就目下情形而論。須以力爭野人山地爲第一要義。至少須以大金沙江爲界。然後沿邊諸土司可以稍安。其次則爭大金沙江爲公共之江。又次則爭於新街北岸。劃一地與我立埠設關。而爭南掌揮人之地爲最後焉。因其地十之六七早已劃與暹羅。又與越南之界相錯。旣不值受彼虛惠。亦恐致與法國分界。又生枝節也。

十八日記

余偕王省山乘馬車赴六汀騰海口遊覽。六汀騰距白

雷敦約四英里。凡居白雷敦者皆往遊焉。余車循海岸而往。循山徑而回。其地本非大鎮。而鄉村臨海。頗有疏野之趣。一路山不甚高。墾田者皆在山半。大麥甫經收穫。風景絕佳。中途過一貧孩院。叩戶入觀之。該院總辦款客殷摯。導觀各處。規模宏敞。院中男女孩凡三百餘人。有廚房。有書庫。有浴室。有飯廳。有讀書堂。有講經堂。有做工所。有演藝場。有洗衣所。有男孩臥室。有女孩臥室。秩然不紊。養牛二十五頭。日取其乳以供院中之用。凡貧孩二歲以上。即可送入院中。迨二十歲左右。皆成一藝以去。俾能自給衣食。無饑寒之慮焉。是時適值午

飯之後須赴場操演以舒其筋骨。總辦邀余觀之。有孩一班專奏兵樂。其餘則演槍法陣法。無不手勢嫺習。步伐整齊。蓋遊樂也。而操練之意寓焉。又邀余聽諸孩奏樂。年皆不過十歲左右。而按之樂譜。悉協宮商。又邀余聽七歲以內諸孩演唱。調皆一律。雖甚幼穉。而意象嚴肅。無有敢跛倚譁笑者。其教導皆用女師。亦頗愛諸孩。如其子聰穎之孩。常有成學業以去者。其次則出爲兵丁。爲樂工。爲畫師。爲木匠。爲裁衣。及一切單技。歲有若干人。諸孩所造器皿。無不精巧。卽代醫之以供本孩之用。於戲至矣盡矣。毫髮無遺憾矣。吾不意古先聖王慈

幼之道保赤之經乃於海外遇之也

十九日記

老撾種人之稱本哀牢夷種偏於西南徼外支裔繁衍老撾始見於明史土司傳不過老撾部落之一嘉靖間始稱南掌蓋雍正以後入貢之南掌國實卽明史之老撾土司也今考老撾全部之地當赤道北十五度至二十一度京師西九度至十八度巴黎東九十六度至一百五度共得法里四十萬方啟羅邁當北界雲南東西南與越南柬埔寨緬甸暹羅爲界其牙錯午貫於暹羅者殆三分之二故暹羅屬地以老撾爲多老撾分兩大部南稱暹羅老

揭多老撾人北稱緬甸老撾卽撾人撾人亦分兩種東
曰白肚番其大部曰纒掌卽南掌也西曰黑肚番其大
部曰景邁卽古大八百媳婦國也南掌景邁之北有大
部曰景東亦曰魯瓦撾人其上游曰魯瓦野番蓋卽中
國所稱爲卡瓦者也其附近曰麥忒曰盧鹿卽中國所
稱爲羅羅者也老撾人性愚而懶然務耕種畜牧亦能
鑄造紡織多奉佛教故皆好生惡殺地產五金各礦稻
則有秔有糯多包穀少粟麥有靛漆藤竹麻棉椰葉桃
榔甘蔗檳榔荳蔻煙葉芝蔴花生而以松木楸木爲最
多野草可製繩織席象牛爲用最大種亦極繁景邁有
出使日記續刻

卷五

三

傳經樓校本

象八千隻。蘭貢有象一萬隻云。

二十日記

西刻。挈眷及繙譯武弁等乘火車由白雷敦回倫敦使館。南掌爲老撾東面部落之最強大者。其都曰隆勃刺邦。當湄公江上游。江由東折而南流。南岡江自東來會。城在山下。適當南岡江會流處。水卽穿城而過。值赤道北十九度五十四分。京師西十四度二十二分。巴黎東北十九度四十五分東北距越南之河內七百四十七里。居民十五萬人。城中二萬人。此國尙號自主。每越八年入貢中國。每次貢象二隻。自咸豐七年貢道梗阻。遂不復貢。亦

進貢於越南暹羅。今號爲暹羅屬國。而法人亦有窺伺之意。地多名馬孔雀文雉。稻土歲四穫。土地肥沃。同治十二年。有雲南人盜據其地。今尙爲所有云。農蓋老撾東面部落衝要之地也。其會城在南掌東南四百二十里。湄公江右岸。江自此曲流向東。值赤道北十七度五十五分。京師西十三度十六分。居民六千有奇。農蓋長官入貢於暹羅。管轄二府。

二十一日記

老撾東面各部有曰邦賽者。在湄公江之南。農蓋之東。居民八千有奇。值赤道北十八度一分。京師西十三度

出使日記續刻

卷五

函

傳經樓校本

二十八分。有曰薩亞布利者。在邦賽之南。居民七千有奇。城在湄公江東南岸之左。值赤道北十七度三十八分。京師西十二度。有曰幾麻刺地者。城在湄公江右岸。值赤道北十六度三分。京師西十一度十九分。景邁爲老撾西而部落之最富足者。卽古大八百媳婦國。元明間稱爲八百土司者也。城在湄南江上游。湄濱江左岸。今地已入暹羅。爲暹地極北之境。東南距曼谷一千七十八里。值赤道北十八度四十八分。京師西十七度三十四分。滇商暹商轉運貨物。必以景邁爲中路行棧。土地肥沃。產米頗多。山中楮木尤盛。附近有銀礦。居民

三十萬人。滇商運售紬緞及五金各貨。轉販米棉花象牙紫梗白蠟香料以歸。至堅硬木料多由水路運至穆爾門。爲外洋造船之要需云。景綫古小八百媳婦國也。城值赤道北二十度十三分。京師西十六度三十八分。其地水陸交衝。自北往南。以景綫爲必由之要路。土沃人稠。物產繁夥。稻米充溢。

二十二日記

蘭邦在景邁東南四十四里。城跨湄濱江之湄光河兩岸。值赤道北十八度三十五分。京師西十七度二十九分。居民一萬二千人。此城爲宋徽宗建中靖國年間建。

至今稱爲富庶之地。產稻米、檜木、蘭。貢在景邁東南一百六十里。城臨湄濱江之湄南、斐河岸。南鄰暹羅。值赤道北十八度十七分。京師西十六度五十七分。居民二萬五千人。產棉花、稻米、漆、檜木、有銅、鐵諸礦。山中多象。喀鄰人圍獲以售於市。故此地亦以象市著。云猛奈值赤道北十八度四十七分。京師西十五度四十四分。猛波勒值赤道北十八度十分。京師西十六度二十三分。兩地皆近湄南江。土脈肥沃。老撾北面部落。景東最大。卽所稱撣人國。進貢於緬甸者也。地處湄公、薩爾溫兩江中間。爲老撾最高處。山聳水陡。皆會於此。城當赤

道北二十一度十九分。京師西十六度四十五分。部落廣袤東至渭公江岸之江壑。西至薩爾溫江岸之莽甯。共三十二城皆隸焉。景東之北東有江洪國。在赤道北二十一度五十四分。京師西十五度四十分。當卽十三板納土司地。西有葫蘆國。在赤道北二十一度五十八分。京師西十八度十二分。當卽卡瓦葫蘆國地。

二十五日記

中國與各國衡富強之術。百不如西人。然有一事足以自豪者。則國債獨少於諸國也。二十年以前。中國本無所謂國債。左文襄公西陲之役。需餉緊急。始派道員胡

光緒商借洋債兩次。然不過數百萬金耳。光緒甲申乙酉之間。法蘭西爭越南。駛其兵艦。擾我海疆。各省調兵設防。糜費甚鉅。於是廣東福建諸省。皆向洋商挪借鉅款。而神機營總理衙門。亦或屬出使大臣。貸諸西洋。爲購礮造船之用。奏明由各省各關按年歸還本利。計國債最多之時。約有二千餘萬金。迄今逐漸償還。當已不滿一千萬矣。東西洋諸國。或地不逮中國十之一。而國債動以數萬萬計。蓋有十倍百倍於中國者。賦稅所入。大半以償債息。其所以百廢具舉者在此。所以不能不厚斂於民者亦在此。曩歲李傅相創議借貸洋債白金。

三千萬兩用以興建中國鐵路此固至急之務亦至善之計也然余意不甚謂然者蓋恐中國風氣未開承辦之人未能事事覈實難免侵蝕虧短之虞而鐵路之獲利尙無把握轉恐加歲月津貼之費夫養路修路既需巨款而三千萬金之償息亦歲不能緩則中國兩受牽累財用必日朘月削恐致一蹶難振儻竟欲造鐵路毋甯枝枝節節而爲之雖無速效亦免鉅累較爲穩著余之愚計如此旣而承辦洋債之陳季同果藉借債之名騙款纍纍以供私用如是則所借之三千萬金并恐未必能全到中國矣幸而廷議早罷之耳余於是恍然於

風氣未開之時籌辦一事難若登天往往利未形而害已隨之非必籌畫之未精也得人之難也

二十六日記

英法各國有所謂高車者亦謂之公車聞創製不過在二三十年以內其式格外高廣內層可坐二十四人上層可坐十六人通衢大街絡繹交馳傭工等人隨處搭坐每行二三里僅需一二本士然此車生意甚旺每車每日約可獲英金二鎊以一鎊養兩馬兩輿夫尙覺綽然有餘所贖之息總在一鎊以外每造一車約需工本二百鎊而購馬在外倫敦一大公司有車千六百輛云

嘗遠而望之。有似樓房駕空而來者。高車也。余謂春秋傳所稱巢車樓車者。殆有類乎是。夫楚子登巢車以望晉師。解揚登樓車以告宋人。今其遺製雖不可見。意者其高或過此車。而寬廣或不逮也。

二十七日記

春秋傳隕石於宋五。隕星也。其解確矣。厥後史傳紀隕星者甚多。今倫敦博物院中有隕星石。其色黑。其長不過數尺。然或以爲一石卽一星。則大不然。蓋一星卽一地球。地球之氣。或太陽與慧星之氣。飛散空中。則當時望之如流星。久而旋轉太空。其大者數百千里。至數萬

里不等。又分爲一小地球。其小者化爲一拳之石。或偶近吾地。則翕附於吾地矣。又攷春秋左氏傳。莊公四年。夏恆星不見。夜明也。星隕如雨。與雨偕也。夫至星隕如雨。余意空中必有與吾地相近之星。或者全球迸裂。火星散布。故猝然見爲夜明。見爲星隕如雨。其或飛至他地球。則必化爲石。蓋受此石者。不止吾地矣。觀於吾地諸山之石。不可殫紀。則孕結成石者。無日無之。其初皆氣也。而氣之偶散入太虛。亦何足爲異也。

二十八日記

總理衙門來電云。華爾身言外部電云。執事停商滇緬。

界務恐是本署意然英仍願和衷相商已告以並無是
意或因議論不合之故當屬再商華使又力辯昔董非
華界挾一統圖爲證考一統圖成於乾隆年蓋西土司
收撫昔董在嘉慶年附聞備辯論余覆電云屢催昔董
撤兵外部忽造停商之說冀聳聽聞足見氣餒擬請堅
持卽可就範昔董兵退則滇西土司皆安界務迎刃而
解請告華使以地卽非中屬敝處所爭別有道理英不
能不認况早經收撫又由恰克圖遞一電云昔董亦非
人山地英去昔董必退至大金沙江以西卽可劃江爲
界以保固諸土司乙酉舊議英雖滅緬而野人山地數

千里本非緬屬勘界時尙須兩國均分夏間向沙侯申此議沙云頗有道理今爭劃江爲界英自無辭因江以西野人山地尙贏兩倍也

二十九日記

英國上下兩議院凡制度刑法軍政度支悉由院中定議而後舉行上院諸員均係世爵舊臣及教中大長等貴顯異常但政事均由下議院議定而詳諸上議院上議院照行者十之七八駁改及暫停者十之二三下議院諸員例由民間公舉凡諸郡縣各舉一人預其選者卽爲該郡縣建白一切事宜其權甚重故有甯棄封圻

之任而以舉授議員爲榮者英國下議院人員之額向
惟六百五十二人嗣因國中郡縣增多光緒十一年已
增至六百七十人英倫舉議員四百九十五人蘇格蘭
舉七十二人阿爾蘭舉一百零三人此現在定額也英
民俗尙向稱敦樸然至今推選議員亦覺隱弊叢生一
則植私黨以廣扶持一則散貨財以延虛譽也卽如六
月間所舉諸員格蘭斯登爲公黨首領其黨得舉者二
百七十五人沙侯爲保黨首領其黨得舉者二百六十
九人此外阿爾蘭黨七十二人巴尼路黨九人更有公
黨之人而持論又常與其黨相違者共四十五人其後

阿爾蘭黨又爲格蘭斯登所籠絡。黨勢遂盛。故得居相位云。

三十日記

美國近有格致士格得新法。製造異樣氣球。升至空中。瞭望敵營。又有新式火器一種。並非傷人之具。不過其煙極濃。擲下敵營。立即煙氣飛騰。使敵人目迷不睹。而我軍可望煙濃處。燃礮擊之。蔑不勝矣。意國造軍燭一種。略如彈子。以礮擊之。所著之處。放大光明。無異電火。藉可瞭望敵人。軍燭一名星彈。現印度亦試用之。法國近出新式藥彈。以最毒藥物置於炸彈之中。被擊者無

不斃。卽在旁觸其毒氣亦必立死。又前創連環快礮之麥心工廠。現復造飛天機器。能載士卒及炸礮等往來空際。可以升至半空。施放炸礮以攻敵營。此器兩旁張二巨葉。恍如飛鳥之有翼。來往空中。進止自如。至連環礮一撥其機。礮卽連環而發。每一分鐘時。能發九百門。其快極矣。又有連環巨礮一種。礮身甚鉅。係用開花彈子。每一分鐘時。能放五十門。近日歐洲又出新式水雷。其機置於岸上。施放者在岸握其機綫。能使此雷從水底來往。非鐵網所能隔。回環轉折。或沈或浮。均由人意。雖數千噸之鐵艦。觸之無不立碎。嗚呼。殺人之器。愈

出愈精而蒼生之受毒無窮期矣

八月壬辰朔記

日本步趨泰西製造一項更銳意講求如大坂製造銅鐵等物東京製造綢緞布匹橫濱製造蜜酒荷蘭水火柴等物其出口貨載往香港及中國各口者以銅紐銅燈管洋傘火柴爲最盛其勝人之處一則地在東方與各口相距非遙易於轉運二則工料皆廉成本較輕三則煤薪產旺製造更易具此三者故出物日精價復廉賤歐洲生意轉爲所奪矣光緒十七年中國洋關報單各省所出土藥三十三萬擔有奇華人之銷用此土

者僅有六分之一。惟於種植鷲粟之法。日精一日。將來必可與印度洋藥並駕齊驅。此豈華人之本意哉。亦不得已而思其次也。

初二日記

滇緬分界一案。已力催英廷速撤昔董屯兵。余意爲爭野人山地。張本蓋欲以大金沙江劃中英之界也。外裔來函。欲余辦文書申說其故。余既於七月二十六日照會外部。據理論勢。層層剖析矣。今日外部尙無覆文。余遣馬清臣往告山特生云。中朝意在必得此地。就情理勢三者而論。英國斷無說以拒之。與其費筆墨煩口舌。

到結局時仍不能不與不如速與之示若出英人之本意以彰公道而聯睦誼且野人山地。在厄勒瓦諦江以東者四之一。在厄勒瓦諦江以西者四之三。英得其三。而中國得其一。在英已大占便利。從前中國不勤遠略。於邊徼甌脫之地。向不介意。今則漸明利害。欲保體面。故於此等事不肯放鬆。然中國能自立。則俄法不能肆其蠶食。英之商務亦不至受損。固英國之利也。英國胡不稍讓荒地。以成中國之美。而示他國以榜樣。則俄國帕米爾之兵。亦可速撤。帕歸中國。固英國之大願也。蓋亦通盤籌畫。輕小利而成大計乎。山特生曰。印度部數

日內必有回音握手而別

初四日記

光緒十五年法國各公司本有之鐵路九千九百九十五啟羅邁當新造之鐵路九千九百九十一啟羅邁當私設者一百四十四啟羅邁當國家設者一千六百四十三啟羅邁當各小公司所設者一千零八啟羅邁當阿勒日內各公司七百零七啟羅邁當綜計二萬二千七百七十六啟羅邁當法京左右多有尚未聯合一氣者往往彼此互繞頗有不便而是年兩次在議院議後又增鐵路并原有者共四萬二千啟羅邁當云 法國

各河多不相通。寬窄深淺不一。開口大小亦不一。來往貨物。必須換船轉運。七十年來。鐵路方興。人心財力。全注於鐵路。故河工稍緩。近時議者。又知貨由鐵路。所費甚鉅。故仍欲修理河道云。

初五日記

法國一千八百七十七年。進口稅二萬五千五百零一萬六千餘方。出口稅二十五萬六千七百方。船稅五百二十三萬九千餘方。雜稅九百二十八萬二千餘方。通共二萬七千三百七十九萬五千餘方。法自改爲民政。國之大權。歸兩議院。奉行條例之權。歸總統。議員出

於公舉一社公舉一人如一社過十萬家外則再計其人如近十萬之數准多舉一員上議院員約三百人內有四分之一永遠不換此三百人亦係考試而得如有乞退乞假則補之四分之三由各府議員推升以九年爲限滿合甲而爲社合社而爲縣合縣而爲府總統七年期滿上下議院公舉另代或留一次亦可國之政務得失其責任不歸總統而歸議院總統之責在議院議定後畫押並管理水陸軍務而已然有用兵之事亦非議院議定不可而選擇宰相及各部大臣之權則歸於總統

初六日記

法國步隊戰兵一百四十四營。二十三萬六千三百人。
獵兵三十哨。一萬八千二百四十人。馬隊甲兵十二營。
龍兵二十六營。輕騎三十三營。共五萬八千一百人。礮
兵每營分十三排。共三十八營。五萬五千二百四十八
人。又十九處學堂之軍樂工共七百六十人。橋兵二營。三
千人。匠藝兵十營。一千八百六十人。精巧工兵三營。三
百十五人。修路兵五十七營。五千一百四十人。共六萬
六千三百十五人。海軍有行船者。有捕魚者。十八歲至
五十歲止。共有十五萬人。法國帑項支銷甚鉅。加以

累世用兵。國債纍纍。故進款不能不多。較之各國爲最重矣。國債一萬七千五百兆方。通年出款二千七百八十兆九十七萬餘方。通年進款二千七百九十三兆十七萬七千餘方。

初七日記

法國近年進款。稅項三百九十二兆十一萬餘方。加重之物稅項二十五兆六十一萬餘方。房產買賣之稅六兆三十八兆零四萬方。樹木之稅三十八兆七萬餘方。海關稅二百八十三兆二萬方。國家自買賣物之稅一千零五十六兆六十二萬餘方。信局稅一百十三兆八

十七萬餘方。人口稅三十四兆九十七萬餘方。電報稅十八兆三十一萬餘方。當差人俸中所出之稅五兆零六萬餘方。阿勒日進項二十五兆八十九萬餘方。工人工資之稅十八兆三十五萬餘方。雜項七十兆十九萬餘方。阿勒日境內公司之稅三兆五十萬方。股分票稅六十九兆五十二萬餘方。通共進款二千七百九十三兆十七萬餘方。而以國家所自賣之物稅爲最大之款。內國家自賣之煙可得稅三百二十一兆四十七萬餘方。此外鹽酒糖紙自來火油皂等項是也。出款。刑部用費三十四兆四十一萬餘方。外部十二兆七十一萬餘方。內部一百零九兆四十四萬餘方。學部一百

十四兆八十六萬餘方。農部商部四十二兆五十五萬餘方。工部二百三十四兆六十萬餘方。兵部五百三十八兆二十六萬餘方。海部一百九十三兆九十五萬餘方。戶部二十兆三十六萬餘方。各項善舉二百四十一兆三萬餘方。國債利息七百四十七兆二十二萬餘方。國債抽還本銀三百十六兆三萬餘方。官差退職養老之俸一百二十四兆九十八萬餘方。殘兵院養老養傷之費二十三兆六十萬餘方。各處刑官之俸十兆三十八萬餘方。雜用十七兆二萬方。通共出款二千七百八十兆九十七萬餘方。

初八日記

阿爾蘭英國三島之一也。古時各部自立酋長。號稱自主。民俗强悍。善戰。常持短棒赴陣。死亡弗卹。西歷五百年。卽中國南北朝時。有耶穌教士巴力門至其地。宣教用以柔制剛之法。專以性善之理。激發人心。民稍化之。然猶未屬於英也。至一千一百五十四年。英王顯理第二得國。值阿內亂。羣酋互爭。有一酋赴英請救。英出勁旅臨之。阿人望風奔潰。全境遂屬於英。然其風俗教化與英內地稍殊。英王慈迷斯第一在位時。已大費經營。欲革其舊習而不能。至一千七百九十二年。卽乾

隆五十八年。阿人因新舊教積不相能。遂自結黨。名曰報國黨。起與英爭。先是英人奉耶穌新教。而阿人仍奉天主教。既多不協。英復設法制之。凡屬阿省議員。均由新教黨人推舉。眾情不服。潛結法國謀叛。入其黨者五十餘萬。潛立文武百官。儼爲一國。英舉兵征之。六年。亂魁就擒。復殲其餘黨。法人救之不克。阿境始平。一千八百零一年。其地始與英國兩省合而爲一。議定阿省一切事權。悉如英制。並准公舉議員百人。列於下議院。又世爵貴族二十八員。總教士四人。入於上議院。自是可相安矣。一千八百六十八年。議院中欲課重稅於阿爾

蘭之奉天主教者名爲維持國教是時格蘭斯登爲公
黨之魁在議院力爭卒廢其法遂爲阿人所推戴得爲
英相一千八百八十二年阿省諸佃戶相率抗糧而巴
尼路黨復袒護之聲勢益雄越三年格相罷政沙侯爲
相屢更律法盡力懲辦始漸救平然阿人久懷分治之
圖麥加底黨之附於格相也先與約曰吾輩合力戴公
復相但事權在握他日開院集議須首議阿爾蘭分治
之事聽其自立議院無須英廷過問格相諾之今果復
相矣故英人惴惴焉謂阿爾蘭若果分治英事將不堪
設想也

初九日記

許竹簣星使來函云。會催俄退兵一節。據英署使稱。外部電告俄兵未到阿富汗境。不便與中國會催。將來有交界事件。可以幫助等語。俄兵現已啟行。將回費爾干省。蓋因天氣已寒。不能久紮之故。阿富汗兵已退出蘇滿卡。總署電轉據陝督電報也。余昨亦接總署電云。帕米爾俄兵已撤。因查各新報謂俄將喬璫夫未到帕地之先。中國已調回華兵之在帕米爾俄界者。又云俄兵四十四名。近進塔什庫爾干。爲中國所驅出云。而柏林又有謠傳。俄將發兵一萬二千。屬喬璫夫爲明春巡帕。

之用則甚不確也。浩罕全境於光緒二年爲俄所併，屬於費爾干省。哈薩克一譯作葛辣格爾紀士，爲昔之最大回部。自咸豐十年西歷一千八百六十年至同治九年一千八百七十年，盡爲俄所吞併。

初十日記

萬國公法。凡遇友邦開戰，應守局外之例，不得濟一國以糧餉軍火。如有陰助此一國者，則彼一國可援公法以詰責之。此數百年舊例也。自庚午年普法之戰，英商運軍械於法者接踵獲利。普相畢士馬克詰問英廷，欲令嚴禁英恐自礙商利，答以普之水師儘可在海搜捕。

如拿獲充公。英廷決無異言。然英法海口相距甚近。法之水師又素強於普。普人竟無如之何也。自是以後。各國援以爲例。凡值友邦開戰。均不禁商人販運軍火矣。惟開戰之國。能不在海面搜捕。則視其水師之強弱。如距英海口三英里。在海面搜拿英商私運之軍火。英廷嘿然聽之而已。甲申乙酉間。中法之釁。法之水師頗在海面拿獲英船運華之軍火。是時中國各省在英廠訂購軍火甚多。相戒不敢起運。後乃先運香港。起貨存棧。再相機運至中國地界。於是軍火絡繹於途。法人雖明知其爲中國所運。亦無如之何。蓋英給護照運往香港。

而法船捕之英水師可與開仗此項公法尙未廢也

十一日記

檳榔江之北有曰札賴江者一名麻里江洋音或譯作
穆雷江自東而西經流巨石萬仞銅壁諸關之外首尾
六七百里至新街合大金沙江雲江三江水利考云
大金沙江流至孟養阻陸地有二大水自西北來一名
大居江又名大車江一名檳榔江二水至此合流又名
大盈江而黃林材檳榔江考則云檳榔江至千崖宣撫
司與騰越之大盈江會土人呼爲海珀江野人山本
中國土司所分轄如隴川孟卯土司之地以野人山地

之洗帕河爲界。麻陽卽鐵壁關漢董兩隘尙在其內。此邊民所共知也。允帽一譯渾門。一譯黃麻。扼古勇昔董兩隘之口。在野人山外。厄勒瓦諦江東邊。爲蓋達土司之屬地。據厄勒瓦諦江上游。形勢亞於八募。對江卽爲孟拱江中有兩大洲。南甸土司與舊時蠻暮土司以野人山中之紅奔河分界。紅奔河一譯作紅蚌河。

十二日記

泰晤士報昨俄京來信云。游擊喬瑞夫於西九月十四日中七月二由帕米爾歸費爾干。日內可抵瑪爾格蘭。至所帶兵數。或謂數千。或謂僅馬兵數隊。皆無稽之說。

實其馬步軍七百人計馬兵二營步兵二營而已喬璫
夫固不能於帕米爾荒野度冬二年前有格郎出夫司
者在帕屬之克什米爾邊界幾至凍斃

十三日記

日大於地球一百三十萬倍地球大於水星十四倍大
於金星少許大於火星三倍土星大於地球一千倍木
星大於地球一千四百倍金星離日二百三十八兆里
軌道在水星與地球之中距水星一千八十五萬里距
地最近時約九百四十五萬里疑有生氣包羅星體之
外其象頗似月輪亦有上弦下弦光滿光半之形其行

與日漸近而伏。伏時或見其過日面。如小黑圓斑。羣史所稱日中有黑子也。此必行星過交綫而地球亦在交綫。乃有此象。與日月食之理相同。乾隆三十四年金星過日面。同治十三年又過日面。光緒八年又過日面。本年閏六月二十八九日。滬上忽傳晝見一星。蓋太白晝見云。

十六日記

泰晤士報西十月初五日

中八月十五日

俄京來信云。喬瑞夫

已於前日歸自帕米爾。抵費爾干之瑪爾格蘭。浩罕之舊都城也。該游擊於西九月十四日自帕起程。途中行

三禮拜計程四百英里馬步七百名來年一交春令恐不免復出甲申乙酉間中法有事張蔭帥方督兩粵創立牙捐各項貨物每價銀一兩抽捐三分藉充軍餉已丑年蔭帥去粵裁去此捐李筱帥因海防善後需款浩繁遂仍仿照牙捐抽收易其名曰臺礮經費近聞剛子良中丞擬裁此捐冀與小民休息云

十七日記

統地球每年銀礦所出之銀約共得五千萬員英國出七萬磅法國出五千磅奧國出九萬零五百磅瑞典挪威出二萬磅西班牙出十三萬磅普魯士出十三萬磅

意大利瑞士俄羅斯出五萬八千磅。比利時出四百四十磅。共約出五十萬磅。中國銀礦甚多。惟每年所出銀數。無從稽核也。金類之中。鐵最多。功用亦最大。質性最便於製造。利益遠勝於他金。洵天下之真寶也。格致家云。鐵可鎔成流質。鑄成形式。可抽極長極細之絲。可軋極廣極薄之皮。彎曲任意。磨厲有鋒。退火可柔。淬水能剛。格致工藝。農田戰守。在在攸賴。又可合製藥物。大有補益。其性宜人。能存於身。非若他種金類。性與人不合也。故凡動物之有脊骨者。其血內必含之。地產數層土石之內。多藏其礦。備人采取。製鍊之。可爲生鐵。爲熟

鐵爲鋼。

十八日記

凡取銀於礦有兩法。一用汞引法。一和鉛鍊法。汞引法又謂之涇法。取銀先磨礦爲細粉如食鹽。十分加熱令變爲銀絲。再加水銀及鐵硫或鐵沙。使汞與銀和合。汞須六倍或八倍於銀。時調攪之。使易與銀合。汞與銀合成膏形。沖水洗去其泥。並濾出多餘之汞。再將銀汞膏置罐內。升去其汞。卽得淨銀。比和鉛法更有益。因能省燒料也。和鉛法謂之乾法。將含銀之礦和以鉛而鎔之。得其含銀之鉛。此鉛或徑用吹風法取銀。或用別法提

鍊而得純銀。此爲最舊之法。凡銀硫礦、銀鉀礦、銀綠礦等俱可用之。然工繁料費，故今不多用。石者，山之骨，地之殼也。然石之中亦含金，金之中亦含石。金與石恆相麗也。石亦礦學之一門。惟其類甚繁，尤可寶者曰金剛石類、曰晶石類、曰瑪瑙類、曰玉石類、曰寶石類。

二十日記

格致彙編云：太古之世，混沌未開，大地之體質軟而熱，儼如火球，沸蕩天空。若一小日，惟體無光，亦無太陽之熱。然其熱氣亦不小。細攷今日地球形，非正圓，南北二極大有收扁之勢。其徑較地腰赤道徑少約八十里。足

徵古之地球體輓而有流動之形也。蓋凡輓體繞軸速轉則中腰之質必向外伸漲而生離心之力。卽離本軸而外漲也。中腰既漲勢必牽動軸之兩端向內癢縮。地成扁球亦同此理。至地之內質今仍含流火之勢。故火山恆噴熱汁。火力奮發。大地震動皆其證也。又有溫泉熱井多處發見。或吐暖氣。或噴熱水。足徵地內火力之厚。是今日地球尙大半爲火質。吾人猶居火球之上也。

二十一日記

酉刻接准總理衙門電開二十一日奉

硃筆薛福成補授都察院左副都御史欽此 格致彙

編云地殼厚薄各處不同最厚不過三百里卽抵地心之火亦有僅厚一百二十里者較之全地猶隔一牆耳又如居蛋之殼吾人所謂極堅厚者實一薄層也惟地內所發熱氣由全而散於天空而地氣反漸涼漸縮地殼因此卽漸增厚亦漸堅實日久年深地殼必將甚厚其下無火力鼓蕩地震必將自止如月面今日之勢今試以遠鏡窺月面有甚大火山周廣多里似已熄滅蓋月體大小僅居地球四十九分之一或疑其體今已涼矣然近見月內一火山又有變形故又疑其仍有火燄吐發也地球徑約二萬四千里周約七萬五千里綜

核面積有六萬萬方里。其質共重二千秊磅。各料合積之重。大於水五倍有半。地體較太陽之體尤重。太陽大於地球一百二十六萬倍。其重僅加於地球三十二萬倍。故知地體更重於太陽體也。地質一立方尺之重。比水一立方尺之重。勝五倍有半。

二十二日記

古時地球所以極熱者。或者本近太陽之故。厥後漸遠。漸涼而散其熱。地面乃有薄殼。復經火力奮發。鎔汁外溢。屢次升高陷低。堅磐鬆散爲粉。遂成泥土。而地殼增厚。初時地殼甚薄。火力易於穿透。故火山吐燄較今時

爲多。如令每年發二十次者。古時必歲發千餘次。每發時噴吐流汁。卽掩覆於舊磐石之上。繼長增高。地殼漸厚。亦漸涼。水氣卽遠包地球之外。水氣熱者復升更高。漸涼而縮。凝落爲雨。雨聚深淵。成爲洋海。如此久之。地面濃霧漸散。清氣分明。遂顯太陽之象。漸轉生機。先生草木。可見地球必歷數千百世。始涼成硬殼。必經受若干變化。始成世界也。地球大體循行天空。每少時有二十萬里之速。吾人附麗地面。隨時遊蕩於天空。不墜不撞。豈非上帝智力無邊。仁慈莫量。豫賦地球以攝力。以成神妙不測之能事也哉。

二十三日記

鍊鋼之工數千年來無甚進益。泰西諸國近百年內格致大興。工藝愈盛。西歷一千七百二十二年。西人路暮兒者。設法造鋼。以熟鐵沁於鎔化生鐵內。令變爲鋼。千七百四十年。西人痕支曼以硬性熟鐵條鎔變爲鋼。千八百三十九年。英人墨希德以錳炭之質鎔和鐵條之內。使變成鋼。千八百五十六年。別色麻設法吹風入鎔化生鐵內。燒去其炭質若干。使變成鋼。明年墨希德設法於別色麻鎔所鍊之鋼。添以含生鐵料。西名司拜古來孫者。得成細鋼。又其後西門子設煤氣鎔於罐內。鎔

鍊鋼料大能省煤。前鍊鋼一噸須枯煤二噸半者。今用此爐祇用粗煙煤一噸半足矣。又西門子與馬丁二人設新法爐能成上等好鋼。所需之料爲零鐵或生鐵或鐵礦。又陪爾奴與本沙德二人設爐較前更精。可以用更粗之料變好鋼。又能用別色麻爐提出鐵內所含磷硫二質。二質有損於鋼鐵。提去之則下等鐵可變爲上等鋼。

二十四日記

格致家以化學論鋼之性。僉謂鋼有五異質。大能改變其體。一炭二磷三矽四錳五硫。議者各宗一說。如鋼含

炭質。或喜其多。或喜其少。鋼含錳質。或謂足增鋼之韌。否則熱時必脆。或云上等之鋼。不可含錳。含錳則不堅。鋼內含磷。利弊難定。德國著名金類家云。鋼含磷不能使鋼變硬。英國格致家則云。令鋼變硬之異質。磷爲最要。鋼內含硫。亦難定其利弊。然皆謂含硫與磷。愈少愈妙。鋼內含砂。人皆謂足令鋼質勻而加硬。亦有反其說者。謂有損無益。鋼內提磷之法。各國尙未通行。最穩之法。莫如仍用不含磷硫之礦。製鍊成鋼。比之用下等鐵礦。製鍊而後去其磷硫者。更爲足恃。如欲以下等鐵礦。鍊成上等之鋼。恐易致誤。且其法煩費。需本過昂。是

提煉之法無甚益也。

二十五日記

生鐵與熟鐵之別。在含炭之多寡。生鐵含炭多。冶之易
鎔。熟鐵含炭少。極難鎔化。生鐵置爐。以風箱鼓風。卽能
融化。熟鐵置爐。燒之。止能熱至白。使錁連而不能融。又
有別者。生鐵能受擠力。熟鐵能任牽力。無論造房屋。造
橋梁。造器具。應豫知何處需擠力。何處任牽力。而配其
料之尺寸焉。汽機機器等件。定而不動者。大半受擠力。
常行動者。大半受牽力與扭力。故動件以熟鐵爲之。定
件以生鐵爲之。間有以紅銅或黃銅爲之。因過薄之件。

生鐵恐易損壞故用黃銅爲更穩。前人以熟鐵爲定質止能加熱捶打。粘合而不能鎔化。近有英人別色麻者。異想天開。別創新法。能將鎔化之生鐵於數分時變爲流質。熟鐵或鋼不必另加燒料。止燒其生鐵內之炭質。卽徑變爲熟鐵。其法創於一千八百八十五年。精思兩年始有所成。以小風箱吹風於釘面。亦能燒去其鐵內炭質。使變韌性。且不獨使風遇鐵外面以燒其炭。並可噴氣入鐵內。使徧燒之。則能自生大熱。或云日本三百年前已用此法。但不及別色麻之精耳。

二十六日記

厄勒瓦諦江之兩支江匯處。西江名邁立開。東江名恩

梅開。邁立開江從良的第卽坎嶺順流而下。其地正當齊

要爾山谷。南界恩梅開江。源流尙未詳。有一嶺曰撥模

拉姆坪。爲野人山極北之峰。在北緯二十六度十五分。

距邁立開江及恩梅開五十七英里。距八募二百零八

英里。恩梅開江衝要水部曰律鏗那。渡西岸而下。至

薩勃克泰拉渡口。遂前至梅湯撥模。再至揮人所居之

邁格納。爲厄勒瓦諦江東岸。距麥開引腦卽米紀納上約兩

英里。麥開引腦踞開陽卽古要路云。穆雷江水道甚

佳。雨後大舟可至門茅。商運佳埠也。再東南經稻稌之

佳。雨後大舟可至門茅。商運佳埠也。再東南經稻稌之

地陟高山至仵坪邊境絕佳乃穆雷江發源處清澈可觀穆雷江及大盈江之間野番所居大半開欽斯種類也。又名欽隆斯自穆雷江至恩梅開江皆係自主之野番並無統屬不如南界土番尙能與緬人交涉也。由渾門至泰朗計三十五英里一路皆宜稻稔數年前被緬兵劫掠又爲開欽野番殘破故昔時皆爲良田以供渾門開克姚孟莫泰洛四城之食者今俱變爲小村落矣。

二十七日記

野人山高得中之數二千至三千英尺又有無數山谷

土宜罌粟。華商運販出口。開欽野番亦能自往交易。八
募北四十英里有地曰升蟠。由八募至升蟠。築路甚易。
如有鐵路。可避江水奔瀉之險。現已由八募築至木蘭
超之添稍。擬定接至升老及孟坪。以至孟拱江口之升
威陞。孟拱乃的山谷。爲華商採取玉礦琥珀礦及橡樹
皮之通衢。而橡樹皮尤爲出口大宗貨物。總計野番地
面約積至三千六百英方里。或再加一千方里。因與四川西藏
接壤此中恩梅開江測量得三萬三千五百英方尺。邁
立開江得二萬三千英方尺。恩梅開江天氣較冷。其江
源不能加長於邁立開江。且不能受西藏呂江之水。

二十八日記

別色麻設法鍊鋼之源流僅二三十年之久。法行於世。爲製造之最有益者。前者果得設掉鐵法。熟鐵一業爲之大興。尼勒生設熱風法。鎔鍊之費爲之大省。至痕支曼以熟鐵變鋼。墨希德以錳炭鎔鋼。皆爲新法。別氏立法起於何時。昔英法之助土攻俄也。別氏以光膛礮放長彈。能旋轉與螺絲礮彈同。可免礮膛車割螺槽之費。而現成之光膛礮俱合就用。報其法於英國。英擯不用。報之法國。法人用之多。造新法長彈。大半爲三十磅者。放以四寸半徑之礮。彈出如法。與放螺絲彈同。觀者

歎服。惟礮皆光腔。生鐵究不甚堅。別氏攷校礮料。乃造小礮一尊。以上等生鐵爲之。色白如鋼。惟較當時之生鐵礮料更韌。從此專究製鍊生鐵之法。不惜資本。不遺餘力。

二十九日記

別有造鋼之法。將熟鐵條入箱。令與木炭相切。連加大熱。閱數日。住火。使漸冷。取出。其鐵則質變爲鋼。面有大泡。謂之泡面鋼。此熟鐵變鋼之理。化學家尙未能知也。泡面鋼剪成短條。用鐵絲捆縛。鍛至粘合。以汽鎚打連。引長則質勻密。宜作剪礎。謂之剪鋼。再剪疊成捆。和木

炭入鑪鍛打一次則謂之雙剪鋼其質更佳五十年前英國所出上等鋼俱此法所造也又新法以上等瑞典熟鐵成泡面鋼打碎盛火泥罐內加大熱鎔之鎔時加以木炭粉傾鑄成塊其質堅而勻細較剪鋼尤佳此之謂鑄鋼亦謂之生鋼後有人以錳與養和入炭粉乘鋼鎔時每百分加一分能使鋼質更細別色麻能於鎔化生鐵內鼓風燒去異質而變熟鐵變鋼惟鍊時熱度極大常鑪不堪任受而熱尙難足用久之乃造大鑪形鑪能盛鎔化生鐵鼓以空氣歷三十分時已成熟鐵初小作鑪僅容十磅至二十磅後造大鑪能容七擔已

甚得法。他鑪之熱無更大於此者。後造鑪漸大。能容一噸至五噸。進風之法。於鑪底通數管。必先鼓風而後進。鎔化生鐵。如先進鐵料而後鼓風。鐵料易塞。

三十日記

倒焰鑪爲鍊鋼舊法。印度等處小作鍊鋼鐵者。古來用之。然攷得全益而合大造者。乃近數十年內之事。且思索多年始成善法。究此法者。一爲西門子。一爲馬丁。西門子本格致名家。如電學。工程學。鍊金類學。皆所研究。一千八百四十六年。始攷節省燒料之法。蓋燒料若干。應發熱若干。生力若干。本有定數。西門子見各路燒鑪。

燒料甚大而生力不足顯有糜費因設回熱鑪使其熱不散而漸顯其應有之力至一千八百六十一年始造成回熱煤氣鑪大爲得法知用於鍊鋼之倒焰鑪必能合用乃代數廠造此種煤氣鍊鋼鑪有一處用此鑪鎔化生鐵與零碎鐵礧成鋼西門子在英國攷求此法之時法國有馬丁者亦攷得相類之法能於倒焰鑪鍊得上等鋼其稍有不同者馬丁將熟鐵和於碎鋼置於鎔化生鐵內製鍊成鋼西門子則以生鐵或鐵礦徑變爲鋼是以異也變通二法合而並用則謂之西門子馬丁鍊鋼法此法鍊鋼有一大難蓋鑪內必得極大之熱

尋常火軋極易鎔化。必擇用極能耐熱之料。法以淨石
英軋碎成粉。每百分加生石灰若干。使有粘性。則見大
熱不鎔。鑪底鋪以白沙。沙內配易鎔之細沙。和勻加熱。
至鋼鎔度則結成硬塊。用西馬二法鍊鋼。卽能耐其大
熱。用之多次。不必換其火軋。如鑪底偶有損處。再加以
沙。卽能鎔化。補平鑪內。所燒煤氣。不可過快。燒之緩則
火燄長。而能得全勢。鑪長二十餘尺。以爲常。

九月丙戌朔日記

光緒十二年。日本出口絲價洋銀一千九百五十四萬
餘員。十四年增至二千八百三十四萬餘員。十七年日

絲出口者九萬五千包。共值洋銀四千萬員矣。其攬奪中國湖絲廣絲之生意。殆將日盛一日。其販往外洋者。美國最多。英法次之。恐將來新金山各埠亦必暢銷。夫日本蠶絲。並非良於中國。西人所以多購之者。其價廉也。日絲之廉於湖絲廣絲者。以中國繅絲概用人力。而日本製絲多用汽機也。中國誠能多購機器以繅絲。而於西北各省。教以蠶桑。出產既宏。人工亦簡。則絲價必較日本更廉矣。

初二日記

防海有四要。曰築礮臺。精火器。儲人材。節財源。礮臺必

與船塢相輔。船塢須地基寬廣。形勢鞏固。轉運近便。地險水深。海口遼緩而紆細。能與內地相聯絡。則妥善矣。造臺必取材異地。洋師洋匠。德爲最宜。美丹次之。英制最良。原可取法。然其人或難駕馭。必有經緯以用之。臺礮重足以鎮守。長足以及遠。必使敵船之礮不能及我。而我礮足制其死命。臺後必設重礮臺。所用者爲攻礮。戰礮。連珠礮。務使近礮與遠礮相間。長礮與短礮相維。水雷以魚雷爲上。其兼船礮雷三項之用者。德國之艇。裹以鐵甲。并安大礮。可攻鐵艦。且可禦哈乞開思連珠礮。每艘費約需九萬兩。槍礮式宜一律。不可參差。至用

器之人。船舶貴能駕駛。槍礮貴能施放。進退疾徐。皆以敵船爲準。能占上風者勝。此外在能辨識風雲沙綫。測量經緯度數。預知趨避之方。則儲材不可緩矣。平日宜於海口設水師學堂。武備學堂。漸收其效。節用之法。曰裁撤廢艦。如拖罟紅單鴈嘴等船。宜省修葺添製之費。專造礮艇。卽英人所謂根砵也。亦以火輪行駛甚速。狹流淺水。無不可用。曰汰除冗費。曰歸併額兵。曰酌收丁稅。曰徧查漁船。

初四日記

紡織必用棉。元太祖征西域。始得木棉之種。攜回中土。

教民樹藝紡織成布衣被羣生五經中無棉字祇有絲字從帛從系則絲固絲屬也至紡花之工先去其子當未有機器以前去棉子者多用人工自英人懷德尼創爲機器去子紡棉者皆用其法而利乃千倍於人工以人工軋去棉子每人每日僅得淨棉三斤餘而植棉者每畝歲收花六十六斤是六畝之花可足一包之數以一人而去六畝花之子必須九十日工程自有機器而九十日之工可以六日成之近來機器愈靈每人日可得淨棉三千斤又去子之後必紡紗紡紗以一人掌車轉而運之使成紗綫以至上機爲工甚繁自有機器則

合二千餘車之紗可併爲一機以三人掌之已足織而成衣矣若夫織布每人每日至多不過二三十尺自有機器一人可掌六機一日成布四千餘匹售出之價以每十尺獲利一分計之每人每日可得銀四兩有奇工作獲利之宏無過於此近日又出新法由軋棉而至織布皆可以一機器連而屬之更覺事半功倍矣

初五日記

現所常用西門子與馬丁法先將生鐵鎔於鑪底再添熟鐵零塊或圓塊由漸而入必俟先添者鎔化後始再添以勺取其鎔料少許傾冷水淬之試其韌性驗其剖

而以定火候。後每百分添以司拜古來孫六分至九分。俟鎔則開鑪放出。傾於模內。用此法每生鐵百分須配熟鐵或零鋼料三百分至一千分。如鑪內置生鐵料十噸至十二噸。鎔鍊七八點鐘之久。漸添熟鐵等料。則七日內能成鋼塊一百噸至百二十噸。每成鋼一噸需煤十三四噸。另以鑪燒成煤氣通入鍊鋼之鑪。用此法於鑪內亦可添上等鐵礦鍊之。西門子與馬丁法之倒焰鑪。有一大益。欲成上等鋼。不必限以定時。鑪內之料可取出少許驗之。如不合宜。則添零鋼或生鐵或鐵礦。配其所需炭質數。而後加司拜古來孫若干。所配之數。

亦有一定。無論何種零鋼碎鐵。皆可變爲美鋼。近來多將廢鐵路條。變爲上等精鋼。又能鑄成極大鋼塊。又凡造緊要之器物。多用之。而不敢代以別色麻鋼。

初六日記

別色麻鋼。西門子馬丁鋼之外。尚有法國人陪爾奴鍊鋼法。英國人回特活德製鋼法。皆創於二三十年之內。亦各有妙用。今造鐵路。多改鐵條爲鋼條。卽修理舊路。亦以鋼代鐵。統計歐洲歲造鋼軌料。有四百餘萬噸之多。蓋鋼條比鐵條耐久數倍。有勝至十餘倍者。近來造船家亦多用鋼。因鋼皮比鐵皮更輕而堅也。故漸廢

鐵皮而用鋼皮。鋼輕於鐵約四分之一。故鋼船喫水淺而進出口岸較易。近來造鍋爐者用鋼板亦大得益。蓋鍋爐體可小而輕也。堅過熟鐵。內受汽之抵力雖大亦不致險。所需燒料更少。近來造礮造彈造鐵甲亦多以鋼代鐵。礮體輕而裝藥更多。放彈更遠。造甲足禦銳彈。甚難攻穿。造礮彈則體薄而多容礮藥。此外鋼之爲用。不勝枚舉。如大小鋼絲。或鋼絲繩。鋼鏈。汽車之輪軸輪牙。兵商船之空心鋼桅。鋼桿。鋼繩。以及鋼筆。鋼鐘。鋼刀。鋼器不一而足。前者生熟鐵與鋼三者分立局廠。今合爲一。蓋鍊礦成生鐵。止加熱一次。即可製成鐵塊。鋼塊。

軋成條板薄皮一火而成。大省燒料。故今之鋼價最廉。與生熟二鐵無甚軒輊也。

初七日記

法國聖沙門地方有鍊鐵家。陪爾奴者。設立新法。造底鑪以鍊鋼。並可鍊熟鐵。與掉鋼。鑪底能轉動。鑪蓋與火膛等定而不動。四面有門可進料。又有四孔。闕以生鐵門。以便開門。用鐵桿掉撥灰。膛門以熟鐵爲之。鑪棚下有進風門。以輪扇法進風於鑪棚。填煤若干。燃火卽發。煤氣通入鑪內燒之。鑪爲圓形。轉底爲圓盆形。以熟鐵皮爲之。邊有鐵圈。鑪底鐵板下有齒輪等。能使底轉動。

以二三馬力汽機轉之。鍊鋼時有水向爐底噴之。藉煤氣以生熱。與西門子馬丁同。而每日成鋼更多。稍有流弊者。已成之鋼從爐底流出。時有變壞耳。一千八百六十五年。回特活德設立新法。將鎔鍊之鋼鐵傾入堅模。以壓水櫃加大壓力。使鋼堅實。模以鋼爲之。分二半。以螺絲螺蓋連之。甚牢。加大壓力之後。鋼汁每長一尺。縮小一寸有半。所成之質極重而堅。所加壓力。每平方寸大略六噸。壓時有多氣放出。及鋼冷再加以壓力。免其內外凝結不勻之弊。用之造礮。能任最大之藥力。迄今各國造礮。均不及回氏鋼礮之堅。

初八日記

英國初創鐵路在紐卡司爾。康熙十五年皮蒙所造專
爲運煤而設。由煤礦至江邊。其軌以木爲之。其車適合
乎軌。其路直而平。其車四輪單馬。能運一百八十英斗
之煤。煤商便之。乾隆三年。卽一千七百三十八年勞氏始創鐵軌。
嘉慶十八年。卽一千八百一十三年威氏始創行遠之機器頭。乃廢
馬運而用火運。嘉慶十九年。卽一千八百一十四年喬氏始創機器
頭。每一點鐘能行六十英里。道光九年。卽一千八百二十九勞
堪氏所造鐵路。每一點鐘能行二十五英里至三十五
英里。而後日新月盛。推行盡利矣。今英國東北鐵路公

司稱機器與火車如皆上等。每一點鐘能行八十六英里。至造路工價各處不同。英國地價甚昂。議院需費亦鉅。每造鐵路一英里。計費英金四萬四千七百餘鎊。其最貴之路。則倫敦地下繞城之鐵道也。初係兩公司議創。曰末脫羅怕立吞。曰笛斯得立克脫。每一英里計費自六十萬鎊至一百萬鎊。從鼻隙不路至歪臨墩街地下鐵道一段。同治二年興造。至光緒十年竣工。又從檻林克洛斯至鉛能街地下鐵道一段。長有兩英里。并有太行臺大車棧大橋以過泰晤士江。每一英里計費英金一百萬鎊。若夫鄉鎮鐵道。工費較輕。爲國家允准。不

收議院之費。而所造鐵軌材料亦稍遜焉。英國三島鐵路總辦去年所出報單。通國鐵路所用資本約英金八萬九千七百萬餘鎊。通年所獲之利息八千餘萬鎊。抵通國所入賦稅之數。而用款須去四千三百餘萬鎊。所養夫役約五十萬人。

初九日記

美國鐵路通盤核算。每一英里工價不滿一萬二千鎊。澳大利亞每一英里約四千四百餘鎊。瑞典國上等鐵路。每一點鐘行三十英里者。途中停留在內每一英里價八千鎊。每一英碼鐵軌重六十四磅次等鐵路每一點鐘行二十英里者。

每一英里價四千鎊

每一英碼鐵軌重五十鎊

三等鐵路每點鐘

行十二英里者每一英里價二千鎊

每一英碼鐵軌重三十五鎊

造

橋鑿山工費無定。儻所開山道係平常泥土。每一英碼

費約一仙令。或一仙令三本土堅實之土。須再加二本

土。若係堅沙頑石。則工費又酌加焉。蓋熟鐵爲軌。始用

於英之施叻克吞及大林吞。每一英碼鐵軌重二十八

鎊。嗣後貝色麻鋼軌通行天下。而軌之重漸加。每一英

碼有重至八十鎊及八十五鎊者。蓋汽車以英國爲最

速。每點鐘能行四十四英里。法車次之。每點鐘行三十

六英里。俄瑞典車最慢。每點鐘行二十九英里。堪納達

於光緒十七年新成鐵路。每一點鐘能行三十六英里。
從黃可浮至白洛克維而。即紐約之對岸共行七十七點鐘。計
程二千八百英里。此往中國最捷之徑也。印度從孟買
至噶爾格達京城。每一點鐘行二十五英里。邇來天
下通改鐵軌爲鋼軌。以鋼軌耐久。勝於鐵軌三倍。鋼軌耐用
五十年。而價又相等。或且較廉。以今鍊鋼之法。轉易於鍊
鐵也。英之鋼軌價最廉。以各物進口無稅也。法德鋼軌
價最昂。以進口稅太重也。

初十日記

光緒十七年。各國所有鐵路總數。英國三島共有二萬

零七十三英里。法有二萬二千五百八十六英里。奧有一萬六千四百餘英里。皆起造於道光八年。美有十六萬七千英里。起造於道光七年。比利時有三千二百十五英里。德有二萬五千九百餘英里。皆起造於道光十八年。丹馬有一千二百餘英里。瑞士有一千九百餘英里。皆起造於道光二十年。俄有一萬九千餘英里。起造於道光二十一年。義有八千一百餘英里。荷有一千八百餘英里。皆起造於道光二十二年。堪納達有一萬四千英里。起造於道光二十七年。西班牙有一千二百餘英里。起造於道光二十八年。墨西哥有五千八百餘英

里起造於道光二十九年。瑞典有一千六百餘英里。秘魯有九百九十四英里。皆起造於咸豐元年。智利有一千九百餘英里。起造於咸豐二年。腦威有九百七十英里。印度有一萬六千九百九十六英里。皆起造於咸豐三年。葡萄牙有一千二百餘英里。巴西有五千七百餘英里。皆起造於咸豐四年。埃及有一千四百九十四英里。起造於咸豐六年。土耳其有一千零九十六英里。起造於咸豐十年。巴拉圭有一百四十九英里。起造於同治二年。阿根廷有五千七百九十八英里。起造於同治三年。委內瑞辣有四百四十一英里。起造於同治五年。

希臘有二百三十九英里。烏拉乖有五百三十七英里。皆起造於同治八年。哥倫比亞有二百三十英里。起造於光緒六年。

十一日記

駐英稅務司金登幹送到光緒十七年通商各關華洋貿易總冊。凡進口正稅七百十五萬九千八百餘兩。較上年贏六十三萬九百餘兩。出口正稅八百二十萬五百餘兩。較上年贏六十六萬七千三百餘兩。復進口半稅一百三萬九千九百餘兩。較上年贏九萬四千一百餘兩。船鈔三十九萬一千五百餘兩。較上年贏六萬一

千七百餘兩。內地半稅五十二萬八千二百餘兩。較上年短一萬二千九百餘兩。洋藥釐金六百十九萬七千餘兩。較上年贏六萬八千八百餘兩。統共二千三百五十一萬八千餘兩。較上年贏一百五十二萬一千八百餘兩。總校華洋貿易貨物之價值。計合關平銀二萬三千四百萬兩。此爲通商以來鼎盛之年。亦居稅課最優之數。至洋藥稅徵二百三十五萬五千餘兩。此卽括在進口正稅之內。是年進口洋貨之價值。總計關平銀一萬三千四百萬兩。較上年多七百萬兩。出口土貨價值一萬萬零零九十四萬兩。較上年多一千三百八十萬

兩

十二日記

西洋各國設郵政局。有郵部尙書理之。凡各港埠輪船入口。到局報明何日出口。何時開行。所至何口。所經何港。該局將官署文件。商民書函。彙於一匣。名曰信箱。凡寄信必到局。購人頭。人頭粘貼信面。多寡視程途之遠邇。英國郵政局一千八百七十年進款。英金五百七萬四千鎊。除出款三百六十六萬九千鎊。贏餘一百四十四萬四千鎊。一千八百九十年。贏餘三百四十四萬六千鎊。其數不爲不鉅矣。又如歐洲電局。祇有大東大北兩

公司一千八百八十九年大北公司約進利息銀二十八萬鎊大東公司上半年約進利息銀三十五萬二千餘鎊。此似除去官利言之

十三日記

光緒十七年各洋關徵稅統共二千三百五十一萬餘兩。內江海關徵六百八十三萬餘兩。比前數年加百萬兩。內外江漢關徵一百八十二萬餘兩。比前約減二十萬兩。閩海關徵一百六十四萬八千餘兩。比前數年減三十萬至五六十萬兩不等。潮海關徵一百六十四萬四千餘兩。比前年約加二十萬至八十萬兩不等。浙海

關徵一百二十二萬餘兩。九江關徵一百十五萬餘兩。
廈門關徵九十九萬餘兩。蕪湖關徵七十一萬餘兩。津
海關徵六十四萬餘兩。淡水關徵六十三萬餘兩。鎮江
關徵六十萬餘兩。九龍關徵五十九萬餘兩。牛莊卽山
海關徵五十八萬餘兩。臺南卽打狗關徵四十七萬餘
兩。拱北關徵四十六萬餘兩。東海關徵三十二萬餘兩。
北海關徵二十六萬餘兩。瓊海關徵十一萬餘兩。宜昌
關徵十萬餘兩。重慶關徵九萬餘兩。蒙自關徵六萬餘
兩。甌海關徵三萬餘兩。龍州關徵一千九百餘兩。查滬
粵等關之所以驟旺者。以洋藥釐金歸併之故。閩漢等

關之所以驟減者以茶葉銷路日衰之故

十四日記

洋貨進口價值一萬三千四百萬餘兩。內洋藥價二千八百三十三萬餘兩。洋布羽綾棉紗棉綫類價五千三百二十九萬餘兩。內棉紗棉綫價得二千零九十八萬餘兩呢羽嗶嘰絨氈類價四百六十九萬餘兩。鋼鐵銅錫類價七百二十五萬餘兩。雜貨類價四千零三十二萬餘兩。內米價六百兩煤油價五百二十六萬餘兩煤價一百七十萬餘兩海味價五百三十萬餘兩自來火價一百五十萬餘兩綜此觀之則棉布呢羽等幾居洋貨價值之半而洋藥亦幾居四分之一為中國計須設法漸杜洋藥之來而

購機設廠織布紡紗尤爲第一緊要關鍵其次則開礦其次則鍊鐵其次則紡織呢羽絨氈其次則仿造自來火及製鍊煤油之屬均開其風氣而致富之能事盡於此矣至以一萬三千四百萬兩之價而進口正稅得七百十五萬兩覈諸值百抽五之數尙多得四十五萬兩則以洋貨之價較減於初定稅則之時之價譬如貨價百兩實已抽至五兩三錢三分六釐以外矣

十五日記

土貨出口價值一萬零零九十四萬餘兩內絲繭價二千九百八十八萬餘兩綢緞絲貨價七百零一萬餘兩

茶價三千一百萬餘兩。雜貨價六百八十四萬餘兩。棉花價三百八十四萬餘兩。紙價一百五十七萬餘兩。草帽鞭價一百六十萬餘兩。糖價二百五十九萬餘兩。衣服靴鞋價一百四十萬餘兩。駱駝棉羊毛價一百十一萬餘兩。煙葉煙絲價一百五萬餘兩。爆竹價一百一萬餘兩。席價一百三十一萬餘兩。其餘如瓷器藥材皮貨等項。價皆不滿百萬者矣。綜此觀之。則絲茶兩宗。合綢緞在內尙幾占土貨價十分之七。如欲整頓土貨。仍須就絲茶著力。庶能握其綱領。其餘如棉糖紙席草帽鞭等類。雖皆係利源所在。尙無絕大關係。然能隨事講求。隨時

整理必有大益。此外土貨俟鐵路開通。當必有於無意中暢銷。如草帽鞭之類者。至以一萬萬餘兩之價而出。口正稅八百二十萬兩。已逾值百抽八之數。與所謂值百抽五者。頗相懸殊。則以土貨之價。已大減於初定稅則時之價。蓋絲茶二者爲之也。

十六日記

光緒十七年進口洋貨價值銀一萬三千四百萬三千餘兩。內除復運往朝鮮貨價九十七萬四千餘兩。再除進口稅銀四百八十三萬五千餘兩。洋藥稅釐四百五十一萬二千餘兩。又除經手七釐用金八百六十五萬

七千餘兩。統計進口貨於起岸時淨值一萬一千五百二萬三千餘兩。至出口土貨價值銀一萬零零九十四萬七千餘兩。內加土貨往朝鮮之價值銀三十七萬八千餘兩。又加出口稅銀六百十二萬餘兩。再加經手八釐用金八百十萬六十餘兩。統計出口貨於下船時淨價值銀一萬一千五百五十萬三千餘兩。總計出口貨之價值比進口貨之價值尙多五十餘萬兩。十六年進出口照此扣算。進口貨價較多於出口者。尙有九百餘萬兩之數。又綜覈光緒十四十五十六三年進口貨價合計三萬一千三百八十一萬五千餘兩。出口貨價

合計三萬一千七百五十八萬五千餘兩。出口之價尙較多於進口之價三百七十七萬兩。此皆已將關稅用金扣算在內矣。

十七日記

前謂洋貨進口稅已值百抽至五兩三錢三分六釐以外。此乃將洋貨與洋藥合併言之。實則原定洋藥之稅本不止值百抽五。今再分別言之。按進口洋藥稅徵銀二百三十五萬五千餘兩。其價值銀二千八百三十三萬三千餘兩。約計值百抽至八兩三錢以外。再加洋藥釐金六百十九萬七千餘兩。稅釐併計共得八百五十

五萬三千餘兩。是殆值百抽至三十兩零一錢矣。至於進口洋貨價值銀一萬零五百六十七萬餘兩。進口正稅銀四百八十三萬五千餘兩。覈之值百抽四兩六錢之數。尙稍歉矣。此非必洋貨之價昂於初定稅則之時之價。吾料彼時中國官員未必不受洋人之欺蒙。所定稅則雖名爲值百抽五。實斷不到抽五也。

十八日記

光緒十七年出口貨價與十六年相比較。茶價多四百三十六萬五千兩。絲價多五百九十二萬八千兩。綢緞價多一百十四萬三千兩。棉花運往日本價多八十五

萬二千兩。駝絨羊毛價多二十五萬八千兩。樟腦地席麝香三項價各多十七萬兩。此爲歷年來最優之數。至進口貨價與十六年相比較。紗布價多八百二十七萬兩。絨氈呢羽價多一百五萬三千兩。銅鐵類價多三十八萬二千兩。歐洲各國中。俄銷紅茶年多一年。是年英國及印度及南洋英屬地。共銷紅茶茶氈茶末在內綠茶七十六萬餘擔。俄國共銷紅綠茶六十四萬六千餘擔。美國共銷二十七萬五千餘擔。其餘皆係小數。是知華茶銷路。英日減而俄日增。亦盈虛消長之數。將來必有俄勝於英之日也。

十九日記

光緒十七年牛莊出口貨價共八百六十萬九千餘兩。較十六年贏五十九萬餘兩。其中運往南省之豆餅二百八十四萬餘擔。豆子三百八十二萬餘擔。豆油九萬餘擔。徑運外洋之豆餅二十二萬擔。豆子三十三萬擔。又關東人參價十一萬一千餘兩。高麗參價十八萬二千餘兩。進口洋貨經由外洋運到之貨。估值三十七萬九千餘兩。復進口之洋貨。由上海來者爲最多。估價五百六十九萬二千餘兩。又土貨進口。估價二百九十三萬四千餘兩。其中棉花最多。糖紙次之。藥材玉器又次。

之。天津進出口貨價共三千七百四萬餘兩。內進口洋貨價值其銀一千八百四十萬九千餘兩。出口赴外洋之土貨價四萬七千餘兩。出口往香港之土貨價三十九萬六千餘兩。復出口洋貨價八百餘兩。沿海出口土貨價五百五十二萬餘兩。內開平煤出口者七萬餘噸。復出口貨價三萬八千餘兩。復進口之貨上海貨價七百七十八萬餘兩。漢口貨價三百七十一萬餘兩。內往俄茶葉福州貨價銀一百八十萬餘兩。九江貨價銀六十五萬餘兩。

二十日記

煙臺進口洋貨價銀一百二十九萬五千餘兩。出口土貨價銀三十九萬七千餘兩。復出口洋貨價銀一千七百餘兩。沿海貿易出口土貨價銀三百八十七萬三千餘兩。其貨以豆餅、豆油、棗子、豆子、皮張、蠶繭、黃絲、草帽、鞭爲較多。復出口之洋貨價銀二十一萬二千餘兩。如洋布、棉紗、糖、鐵、鹿茸、自來火之類。復進口貨價銀七百四十四萬九千餘兩。洋貨以洋布、棉紗、銅鐵、錫、自來火爲較多。土貨以開平煤、滬局仿織布、紗及糖、麻、絲、棉花、夏布爲較多。綜計洋貨進口價銀五百九十八萬八千餘兩。土貨進口價銀二百五十四萬餘兩。出口貨物價

銀四百二十七萬一千餘兩。重慶自開關後半年中
出口貨價約銀一百三十萬九千餘兩。以豬毛青麻麝
香五倍子大黃紅花黃白絲繭殼川土藥材爲大宗。藥材
值銀十七萬八千餘兩復進口之洋土各貨均由宜漢運來。洋貨
約值銀一百三十七萬餘兩。土貨值銀九萬四千餘兩。
洋貨以布紗呢絨爲大宗。土貨以棉花海味藥材爲大
宗。

二十一日記

宜昌一口。進口洋貨淨值銀二百三十四萬餘兩。復出口之
貨價已除進口土貨淨值銀四十一萬五千餘兩。出口土貨

淨價一百十八萬餘兩

內掛旗赴重慶之貨價二十二萬餘兩

又由川省

下水出口貨與復出口貨共值銀二百四十九萬餘兩

此皆由重慶來者與宜昌無值也進口貨以洋紗洋布

爲最旺出口貨以麻木耳皮油三項爲較多漢口進

口洋貨淨價一千一百七十萬餘兩進口土貨淨價六

百萬餘兩出口土貨淨價二千七十七萬餘兩洋貨由

外洋直抵本口者祇有日本煤炭一宗

係俄商製磚茶所用其餘

皆係復進口之貨火油最旺呢羽倭銅荳蔻砂仁魷魚

洋顏料自來火亦多土貨以茶葉爲大宗徑往英俄二

國者二十六萬餘擔俄商生理年盛一年遇有好貨不

惜重貲爭購如甯州茶安化茶高橋茶肅家市茶羊樓
峒茶皆勝往年其餘如煤棗子花生石膏麻牛步藥材
米麻油柏油亂絲頭煙葉白蠟等遜於上年豆子五倍
子茯苓桐油牛油顏料芝麻白絲黃絲煙絲杉木壽木
勝於上年復進口之土貨黑胡椒綢緞等物勝於上年
藥材檀香糖等項遜於上年復出口洋貨無土貨出內
地無

二十二日記

九江一口洋貨進口價四百五十四萬餘兩土貨進口
價一百三萬餘兩土貨出口價八百二十六萬餘兩出

多於進二百六十八萬餘兩。而進口之金銀較出口者多至二百五十四萬餘兩。比較前兩年亦大致若此。民間能以土產易金銀。足見富庶景象。出口貨以茶葉爲大宗。本年出產頗旺。貨亦暢銷。其計出口紅茶十九萬八千擔。估價銀五百七十四萬兩之多。其餘毛茶、甄茶、茶末均不甚多。洋貨皆由上海復進口者。洋布、手帕、銅鐵顏料、玻璃、煤油、羽毛皆見加增。土貨進口則墨魚白、糖亦見加增。蕪湖進口洋貨價銀三百三十五萬餘兩。復進口之土貨價銀一百六十三萬餘兩。出口土貨價銀五百二十六萬餘兩。內米價得三百九十萬餘兩多運往廣東者洋貨

前數除洋藥外值銀二百十三萬餘兩。棉紗煤油年增一年。洋布絨羽銅鐵無甚增減。土貨運往上海者。以茶絲毛貨爲大宗。又茶絲棉花藥材紙張亦運往漢口。土煤運往鎮江滬浙。復進口之土貨。赤白糖最旺。土布次之。桐油次之。夏布柏油又次之。

二十三日記

鎮江進口洋貨價銀九百二十萬餘兩。土貨進口價銀四百九十五萬餘兩。土貨出口價銀一百六十七萬餘兩。洋貨以洋布棉紗呢羽舊鐵火油爲大宗。出口土貨以豆子花生金針菜爲大宗。草帽鞭將來亦可爲出口。

大宗又山羊皮由東豫皖省辦來運往美國爲製造皮紙等用至金銀出入已丑年進口銀數一百六十一萬餘兩出口銀數二百五十九萬餘兩庚寅進口銀一百九十六萬餘兩出口銀四百十五萬餘兩辛卯進口銀九十八萬餘兩出口銀二百六十一萬餘兩上海進口洋貨價銀二千五百十四萬餘兩除去稅費淨值一千九百七十四萬餘兩出口土貨價銀四千八十三萬餘兩再加稅費估值四千五百三十萬餘兩洋貨以布匹棉紗絨羽機器舊鐵煤油爲大宗日本各貨價廉物美銷售亦廣土貨以絲斤爲最旺茶葉次之棉花又次之運往日本草帽鞭苟能認真揀選亦可暢

銷復進口復出口之土貨如豆子綠豆豬鬃毛紅黑棗
湖北煤開平煤有幾種較東洋上等煤尤佳鮮鴨蛋五倍子爲外洋製牛皮
用之花生油均暢旺米進口數大減而出口者有五百八
十二萬擔以本省年豐也硫磺進口較多煙絲銷路漸
絀

二十四日記

甯波進口洋貨估值銀六百十五萬餘兩進口土貨估
值銀一百八十萬餘兩出口土貨估值銀四百九十一
萬餘兩洋貨由外洋直通甯波者煤爲大宗計二千四百餘噸
來自日本其餘白糖靛青沙藤之屬僅裝兩輪船復進

口之洋土貨布匹內有滬織之布六百疋似甚厚實又無漿粉塗刷之弊火油自來火糖豆餅爲最盛土貨運滬出口以明礬帶子棉花墨魚紙扇草帽藥材花生綢緞綠茶醬豆腐魚乾魚肚魚膠草席紙張爲大宗復出口之土貨木耳藥材較多現銀進口者七十六萬餘兩出口者二百五十三萬餘兩兩年來出贏於進者一則經過常關各船運進之款可敷甯地之用一則內地商販將土產運滬匯銀來甯就地收買進口之貨市面來源得以不匱温州進口洋貨估值銀三十七萬餘兩進口土貨估值銀十萬二千餘兩出口土貨估值銀十六萬四千餘兩內茶葉價

銀十萬一千餘兩。次甌柑杉木雨傘。洋貨以煤油洋布。洋藥自來火爲大宗。

二十五日記

福州進口各貨。價銀五百七十二萬餘兩。出口土貨。價銀六百二十九萬餘兩。

再加稅費實銀七百八十一萬餘兩。

土貨首重茶

務。近有江河日下之勢。若非認真講求種製。恢復本來貨色之佳。必至一蹶不振。今年較上年又減少三萬擔。適如向所運銷英國之數。其販往英屬南洋各島者。雖稍絀。而販往歐洲美洲者。則稍贏。又戊子年官倡織布局。係用印度棉紗。每匹布值洋四角。既免釐金。尙覺暢

銷其餘如竹竿鴨毛古玩水菓不過小宗洋貨棉紗最

旺洋布煤油

美六次
俄四

之前現銀進口歲計四百萬兩皆

爲購茶而來今則茶市蕭條竟短其半

廈門進口貨

價銀八百四十三萬餘兩

減去稅費僅七
百十二萬餘兩

出口貨價銀

二百三十三萬餘兩

再加歲費實銀二
百六十八萬餘兩

土貨以茶葉爲

貴物臺茶爲廈門出口貨之大宗各茶出洋者共十七

萬五千餘擔比上年增三萬八千餘擔興旺如此全靠

臺產厦茶出口已落到極少之數藝茶者未見整頓恐

日益衰減其運往沿海各口者以糖爲首計二十萬擔

價銀七十九萬餘兩餘如麻布麻布袋桂圓鮮柚子煙

絲紙張等亦不少。洋貨棉紗最旺。自來火。火油。洋布。銅鐵。呢羽等次之。

二十六日記

淡水即滬尾進口洋貨價銀一百六十九萬餘兩。進口土

貨價銀五十萬餘兩。出口土貨價銀三百十萬餘兩。再加

稅費實銀三百七十萬餘兩出口樟腦暢旺。計一萬六千擔。值銀二

十五萬三千餘兩。產腦在內山生番之地。須駐兵防護。

現定每釐月繳防費洋八角至五角。合算防費每擔約需洋銀九員茶

葉出口稍添。而品色未見精美。恐將衰減。基隆出口之

煤。現俱採自民井。前開之八斗官井煤苗已竭。擬在暖

暖另闢新井。非集鉅本。難收實效。鐵路自臺北抵基隆。一律告成。日開三次。南路亦造至龜仔嶺。約二十七里。其餘鐵軌已設至桃仔園地方。又自十六年夏。基隆八堵創建鐵橋。始於夾溪中見金砂。男女雲集。競相淘洗。自三貂嶺下直達溪口。節節俱有。計至年底。所獲金價約值銀數十萬兩。運往香港之金砂重四千五百臺南即打進口貨。價銀一百四十九萬餘兩。出口土貨。價銀一百六十三萬餘兩。土貨赤白糖爲大宗。桂圓樟腦果子次之。

二十七日記

汕頭進口洋貨價銀八百八十九萬餘兩。進口土貨價銀九百八萬餘兩。出口土貨價銀八百二十三萬餘兩。再加稅費實銀九百二十九萬餘兩。洋貨以洋布棉紗火油爲最旺。鐵錫次之。呢羽絨氈又次之。土貨出口赤白糖共一百六十四萬餘擔。最爲大宗。茶葉橙子柑子次之。土布神香錫箔墨魚又次之。復進口土貨豆餅三百二十萬餘擔豆子一百三十萬餘擔爲大宗。白米蘇子棉花次之。廣州進口洋貨出口者已剔除。估值銀一千二百四十一萬餘兩。進口土貨估值銀一千五百三十八萬餘兩。兩共二千七百八十萬餘兩。減除稅費實銀二千四百十九萬餘兩。出口土貨復出口者估值銀

一千八百十五萬餘兩。再加稅費實值銀二千零二十九萬餘兩洋貨惟布鉛兩項大減。織作土布所用自來火、火油銷流極暢。復進口土貨由北洋三口運來者，值銀四百二十五萬餘兩。由長江等口運來者，值銀一千四十六萬餘兩。以豆餅、豆子、豆油、米麥爲大宗。米較上年多進二百五十萬擔。出口土貨如地席、土絲、桂皮及他項，俱增於上年。茶葉、爆竹、赤糖俱減於上年。又土貨運北洋三口者，值銀二百七十五萬餘兩。運上海及長江各口者，值銀一百十四萬餘兩。運甯波及南洋各口者，值銀十七萬餘兩。

二十九日記

九龍關進口洋貨。十六年值銀一千七百九十六萬餘兩。十七年僅值銀一千三百二十九萬餘兩。所少之價。則惟米火油洋藥三項也。其餘洋布棉紗鉛鐵等類。頗皆增旺。出口土貨。均係運往香港。值銀一千七百一萬餘兩。較上年多二百餘萬兩。此項增多之數。茶葉實居其半。土絲一項。出口者四千四百餘萬擔。價銀一千四百六十餘萬兩。綢緞赤白糖煙葉煙絲。均有起色。由香港復進口之土貨。價銀三百三十七萬餘兩。由本口運往各口之土貨。價銀一百八十五萬餘兩。拱北一關。

除港澳往來之貨其值銀三百六十七萬餘兩不計外
其進口洋貨值銀三百六十五萬餘兩如洋藥洋布棉
紗棉花火油均較前減色出口土貨值銀一百九十一
萬餘兩生絲紅茶較前增旺花生油蠶繭較前減色

出使日記續刻卷之五終